



[UN COMUNIDAD NOBO - \(Home\)](#)

## CONTENIDO:

[Carta personal di Lider di MPA](#)

### [I. INTRODUCCION](#)

Vision y principio di partido

### [II. UN COMUNIDAD NOBO](#)

### [III. SECTORNAN](#)

#### [1. Sector Social](#)

- a) Nos Famianan
- b) Nos Grandinan
- c) Nos Hubentud

#### [2. Sector di Enseñansa](#)

#### [3. Sector di Deporte](#)

#### [4. Sector di Salubridad](#)

#### [5. Sector di Cultura](#)

#### [6. Sector di Finanzas](#)

#### [7. Sector Economico](#)

#### [8. Sector Turistico](#)

#### [9. Sector Laboral](#)

#### [10. Infraestructura y Medio Ambiente](#)

#### [11. Sector di Husticia](#)

- a) Sector hudicial
- b) Admision stranhero

#### [12. Maneho di comunicacion](#)

#### IV. PUNTO DI BISTA RIBA GOBIERNO

1. Principionan di gobierno
2. Aruba su posicion estatal: Reino y Union Europeo

#### **Carta personal di lider di MPA**

*Respetabel ciudadano,*

*Ta un honor pa mi persona como lider politico di nos partido pa a tuma un paso historico na 2005 pa lanta Movimiento Patriotico Arubano. MPA den apenas tres luna di existencia a logra di saca 3688 voto y tabatin mas cu suficiente voto pa haya un asiento. Nos lema tabata **TUR HENDE TA CONTA** y esaki ta e fundeshi di principio di MPA. Na final di campaña nos a haya un nificacion pa cual MPA ta para cu ta: **Mi Pais Aruba**.*

*Durante e ultimo cuater añanan MPA a traha masha duro mes y a demostra cu ta posibel, cu aunke bo ta den oposicion, pa logra trece cambio. Un par di ehempel di logro ta:*

- *cu e ley di ensenanza obligatorio cu tabata drumi desde 2002 a wordo activa,*
- *cu no ta corta coriente ni electricidad den weekend,*
- *cu a tuma accion preventivo contra dengue despues cu MPA a insiti,*
- *entrega di ley iniciativa contra violencia domestico pa proteha e famia,*
- *entrega di ley iniciativa pa hisa edad di 16 pa 18 aña pa por cumpra alcohol,*
- *entrega di ley iniciativa pa famia di Arubiano no naci na Aruba ta wordo respeta. Gobierno awo a ehecuta e cambio,*
- *WEB a publica e formula con ta calcula brandstofclausule,*
- *un Plan Nacional contra Obesidad y logra cu el a wordo aproba door di European Public Health Alaince,*
- *bin cu mocion pa scol te mas laat y awo esaki ta wordo ehecuta,*
- *logra no a bende bestuurskantoor y conserv'e pa e futuro generacionnan.*
- *Logra cu e cambio di orario maximo di trabao ta 44 ora enbes di 48 ora wordo acepta y poni den e cambio de ley laboral.*

*Como parlamentario mi tabata den tur 18 comision y ta e parlamentario cu ta mas presente na tur reunion. Mas ainda, a resulta cu tur aña MPA a haci mas pregunta na e Ministernan durante tratamiento di presupuesto cu e otro partidonan.*

*MPA a demostra di ta un partido serio y cu no ta critica so, pero tambe ta traha pa trece solucionnan dilanti y ta hasta traha e ley mes pa por trece cambio. MPA a demostra cu ta posibel pa logra trece cambio pa nos pueblo fo'i oposicion*

*MPA ta un partido na unda e ser humano ta para central. Bida na Aruba a bira dificil. Situacion financiero di e ciudadano ta precario y e problemanan social a aumenta. MPA ta preocupa pa e futuro di nos pais y nos yiunan. MPA ta preocupa pa e situacion economico mirando e recesion mundial cu lo afecta nos isla y nos turismo tambe. Ta primordial pa tuma e decisionnan corecto cu no lo sacrifica nos futuro generacion. Nos tin cu tuma accion awo*

*pa nos yiunan lo no ta confronta cu un peso encargabel.*

*P'esey MPA a bin cu un vision pa construi UN COMUNIDAD NOBO pa asina salvaguardia nos comunidad, famia, yiu, cultura, norma y balornan, historia y fe cu Aruba ta un pais bendiciona. Esaki ta posibel cu MPA.*

*Ta ora pa nos tur uni hunto y tuma e rumbo di nos pais den nos man. E momento a yega pa lanta para y tuma e prome paso pa un cambio positivo. Un cambio pa UN COMUNIDAD NOBO na unda TUR HENDE TA CONTA. Un cambio na unda Aruba ta na prome lugar. Un paso pa un gobierno basa riba igualdad, respet y cu capacidad. MPA ta un partido cu e pueblo por confia y depende riba dje. MPA a demostra esey y lo ta e partido grandi pa e futuro di Aruba.*

*Uni bo mes cu MPA riba 25 di september 2009 pa trece e cambio anhela. Uni bo mes y forma parti di e construccion di UN COMUNIDAD NOBO. Uni bo mes y sea parti di historia. Pasobra cu MPA, "E Ta Posibel."*

*Atentamente,*

*Movimiento Patriotico Arubano*

*Monica Kock*

*Lider Politico*

[Back to Top](#)

## **VISION Y PRINCIPIO DI MPA**

### **MISION DI MPA:**

*MPA ta un partido Social Democrata na unda e ser humano ta para central. MPA ta boga pa Aruba ta un pais uni, na unda e ciudadano lo tin un bida sano y cu dignidad. Un pais na unda progreso economico lo refleha den progreso comunitario. MPA lo tene e norma y balornan halto, a base di trato igual pa tur hende, respet pa bida y ley, cu reglanan di etica, integridad y transparencia.*

### **VISION DI MPA:**

*Un comunidad balansa unda e hende ta biba den harmonia cu otro y unda tin un distribucion husto di e entrada y rikesa nacional pa medio di promove un desaroyo duradero y sentido di solidaridad y patriotismo.*

### **E PRINCIPIONAN DI PARTIDO MPA:**

**MPA ta lucha pa obtene distribucion husto di rikesa y di poder, door di participacion activo di tur ciudadano den e area economico, social y politico, sin haci distincion entre sexo, rasa, religion, edad, origin etnico. E principio basico ta inclui libertad, igualdad y sentido di hermandad y democracia.**

**MPA ta un partido serio y profesional na unda e ser humano ta central y lo para pa:**

- trece union na Aruba;

- un pais na unda igualdad y husticia ta e norma;
- prosperidad wordo parti na un manera husto pa un y tur;
- e ser humano tin un bida cu dignidad;
- libertad y e derechonan fundamental di e ser humano.

### **MPA ta un partido:**

- cu ta para pa principio;
- cu tin curashi pa atende e problemanan cu Aruba ta enfrenta;
- cu profesionalismo;
- cu curason grandi unda e ser humano ta central;
- cu ta representa un alternativa berdadero pa por tin un cambio pa Aruba.

## **Na unda TUR HENDE TA CONTA!**

### **NORMA Y BALOR**

E pais mester ta funda a base di un comunidad di ciudadano cu ta biba segun norma- y balor halto. E norma- y balornan di MPA ta encera:

- **Respet mutuo,**
- **Integridad,**
- **Spiritualidad,**
- **Perseverancia y**
- **Responsabilidad propio.**

A base di su vision y principionan MPA lo dirigi nos Pais Aruba pa nos por logra yega na **UN COMUNIDAD NOBO** na unda nos tur ta biba segun e principionan, norma y balornan saliendo for di e principio fundamental di MPA cu **TUR HENDE TA CONTA**.

[Back to Top](#)

## **UN COMUNIDAD NOBO**

MPA su vision ta pa construi **UN COMUNIDAD NOBO** na unda e ambiente social ta agradabel y cu cada ciudadano, a base di esfuerzo propio, por satisfice su necesidadnan material y economico.

Un comunidad unda tur ciudadano por desaroya su potencial individual y biba un bida productivo y creativo cu ta satisfice su aspiracionnan propio, pa asina e por aporta na desaroyo y bienestar di su famia y di e comunidad en general.

Un comunidad cu ta stimula desaroyo humano den su totalidad: esaki ta encera e parti intelectual, social y spiritual.

E meta principal ta pa cada ciudadano desaroya y mantene un calidad di bida digno y eleva den un ambiente adecua pa su felicidad.

## PILARNAN DI E COMUNIDAD NOBO.

E programa "*Un Comunidad Nobo*" di MPA ta enfoca riba e siguiente strategianan.

- **Calidad di bida** - Desaroya un comunidad cu socialmente ta combibi segun e normanan estableci den un ambiente di seguridad y cu sentido di husticia. Mester garantisa un forma di bida adecuado cu por brinda proteccion social debido na nos hendenan. Cada ciudadano segun su capacidad y esfuerso por desaroya su mes maximalmente.
- **Formacion**- Formacion ta encera enseñansa y educacion. Formacion ta e fundeshi di un pais. Formacion ta duna hende e oportunidad pa logra su metanan den bida.
- **TUR hende ta conta** - No tin hende cu ta miho cu otro of merece mas cu otro. Tur hende ta igual. Tur hende ta importante y ta para central. Mester promove e derecho di cada un sin distincion di religion, rasa, color, sexo ni origen.
- **Desaroyo y crecemento economico duradero y sostenibel cu impacto social positivo** - Un strategia di desaroyo economico diversifica y balansa lo yega na un crecemento economico duradero y sostenibel cu impacto social positivo, teniendo cuenta cu medio ambiente.
- **Bon gobernacion** - Gobernacion mester ta integro y dirigi na logra resultado concreto, basa riba e metanan estableci pa medio di accion transparente y eficiente. E mester tin e responsabilidad pa garantisa continuidad di liderazgo. Den e proceso aki, tur esnan involvi, na tur momento mester tene nan mes na e norma-, balor- y principionan democratico.
- **Nos futuro generacionnan** - Decisionnan di awe no mag perhudica nos futuro generacionnan. Nos tin cu garantisa e futuro generacionnan e mesun oportunidadnan cu nos tin awe. Dunando e generacion actual e guia y sosten necesario, nan lo percura pa realisa *Un Comunidad Nobo* .
- **Medio ambiente** - Mester bin cu un vision pa nos isla ta e ehempel den Caribe, pa ta un pais ecologico y limpi. Gobierno mester tuma e pasonan pa Aruba ta independiente di petroleo, stimula energia alternativa y cuida medio ambiente. Esaki ta encera tambe un maneho completo pa tene Aruba limpi.

Den e siguiente capitulo lo splica **E VISION DI UN COMUNIDAD NOBO** . Banda di e vision di "UN COMUNIDAD NOBO" riba cierto tereno a traha un plan separa cu mas detaye di e vision di UN COMUNIDAD NOBO. E plannan ta :

## PLANNAN DI MPA

- **FORMACION DI UN GENERACION**
- **FAMIA**
- **UN BIDA SANO**
- **UN BIDA SIGUR (HUSTICIA)**
- **UN ECONOMIA DURADERO**
- **UN GOBIERNO .....**

[Back to Top](#)

## ***E COMUNIDAD SOCIAL***

MPA kier establece Un Comunidad Nobo na unda union, harmonia y e ser humano ta para central. E ta e mesun comunidad, cu e mesun hendenan, pero den un forma caminda tur hende ta conta. Caminda tin mas atencion pa esnan cu no

tin voz y di menos recurso. MPA ta papia di desaroyo socio-economico. Kiermen desaroyo economico hunto cu un impacto social.

Door di e decisionan di e ultimo 15 añanan, pa enfoca y acelera e economia sin tene cuenta cu e impacto social, a pone nos comunidad cambia cu un rapidez cu a influencia nos famia, nos sistemanan, safetnet, nos norma, balornan y identidad. Mas ainda cu pa motibo di crecemento economico acelera, awo nos ta un pueblo di cual solamente 60% a nace na Aruba. E desaroyo a causa tambe cu nos hende muhernan ta traha. Esey kiermen cu nos yiunan mayoria bes despues di scol mester keda un otro caminda of nan ta keda nan so na cas. E sistema di "safety net", un red di seguridad, pa nos muchanan, famia y barío a desaparece.

E falta di atencion ta trece cu e mucha/hoben ta busca e atencion otro caminda. Alcohol, droga, embaraso hubenil, dropout y e resultadonan na scol ta baha. Nos tur ta consciente di e problemanan y peligernan. Ora un mucha dropout ya su futuro ta determina. Su oportunidadnan ta menos y e chens ta grandi cu e lo haya su mes den problema cu husticia. MPA kier evita esaki.

Mas ainda ta resulta cu nos comunidad ta existi awendia di diferente famia hunto. Banda di e famia tradicional, na Aruba nos tin hopi famia cu ta consisti di un mayor so. Y nos tin e famia cu ta casa pa di dos biaha. E famia tin yiu hunto y hopi biaha cada partner tin nan yiunan di e relacion anterior. Tin biaha nan ta biba hunto so. Nos famianan ta multidimensional.

Cu e desaroyo nos comunidad a cambia y mester duna nos famia tur sosten necesario. Mester fortalece nos famia y pone atencion special.

P'esey MPA kier establece Un Comunidad Nobo na unda e ser humano ta central. Den esaki e salida ta un desaroyo socio-economico na unda e pilarnan central ta e economia duradero, un sistema social nobo, un bida cu dignidad, formacion di un generacion, husticia pa tur. Asina e comunidad ta haya e frutonan di e desaroyo economico.

[Back to Top](#)

## 1. SECTOR SOCIAL

*MPA kier trece cambio riba tereno social. Por ripara cu e comunidad ta sufriendo. Gran parti di e hendenan na Aruba tin un entrada di Afl. 1.500,= (salario minimo). Hopi hende ta biba bou di e nivel di existencia minimo (bestaansminimum). Ta dificil tur luna pa paga tur e gastonan cu tin. MPA ta sali for di e punto di bista cu pa alivia e situacion financiero di e ciudadano mester reduci e gastonan mensual. P'esey MPA lo bin cu accion cu ta reduci e gastonan di e ciudadano p.e cu un parti di e huur por wordo deduci di impuesto. Esaki lo proteha nos economia. Asina pueblo lo bay dilanti y progresa. MPA ta boga pa lo siguiente:*

- MPA lo percura pa e pueblo di Aruba haya un *bida cu dignidad* pa asina nan tin e habilidad pa por paga nan gastonan primordial.
- Mester *mara e onderstand na e costo di bida* pa asina garantisa cu e personanan vulnerabel no ta bay atras den nan calidad di bida.
- MPA lo introduci y ta apoya e *programanan* cu ta encurasha y re-educa e personanan cu ta *biba di onderstand pa drehta bek den e forsa laboral of yuda den barío*. Mester amplia e cooperacion entre sector priva y gobierno di un manera cu tur e partidonan ta beneficia.
- MPA kier introduci un sistema na unda un persona cu ta paga *huur* mensual, lo haya un *reduccion via belasting*. Door di esaki su gastonan lo baha.
- Ta primordial pa investiga *energia alternativa* mas profundo, manera e.o. molina di biento y energia solar, pa baha e prijs di e awa y coriente.
- MPA kier *reduci* e orarionan di *trabou* for di *48 ora pa 44 ora* pa siman maximo, kedando cu e mesun salario. Asina e

trahador ta haya e oportunidad pa dedica su mes na su famia. Pero alabes e trahador ta bay dilanti den su salario door cu e ta ricibi e mesun salario trahando menos ora. E trahador ta haya oportunidad pa sosega y door di esey e lo ta mas productivo. Esaki ta nifica cu e arbeidsongeschikt lo baha.

- **MPA kier stimula trahamento *part time* pa asina e por dedica mas na e famia.**

- MPA ta boga pa *hisa e sueldo minimo* pa e nivel di bida cu ta mas sostenibel pa e ciudadano.
- *Amplia e canasta basico* y haci control sistematico di e prijsnan y fecha di vencemento di e product. Lo tin cu actua mas severo contra esun cu no ta cumpli cu ley.
- *Reforma y adapta prijs di awa y electricidad*. Coregi e sistema di brandstofclausule y instala un comision pa controla e prijs total di awa y electricidad. Institui un *fundacion* pa yuda esnan den necesidad cu e pago di utilidad.
- Traha *cas social* y duna mas oportunidad pa por cumpra cas social pa medio di *huurkoop* .
- Mester implementa e *ley di proteccion contra violencia domestico* di MPA. Ta necesario pa combati violencia domestico y proteha tur victima sin distincion. Kiermen hende muher, homber, mucha y grandinan.
- MPA lo combati tur tipo di *adiccion* cu un estructura y programa adecuado. Lo busca afiliacion cu e institutonan cu ta traha contra adiccion cu lo duna sosten y guia na Aruba pa e adicto. Lo encera combati tur sorto di adiccion manera droga, alcohol, wega di placa, wega di computer. Mester establece *halfwayhouse* pa yuda e adicto resocialisa.

- **MPA lo bin cu solucionan concreto pa combati e *problema di e adictonan ambulante* , mihor conoci como "*chollerproblematiek*".**

- MPA ta boga pa bin cu un instituto cu ta enfoca solamente riba *fortifica e famia* . E instituto mester duna guia pa e problemanan y consequncianan di relacion: separacion, divorcio, financiero, adiccion.
- *Centro of club di bario* : reviva esakinan y ekipa nan pa e Centro por sirbi e hobennan y e grandinan na unda nan por topa.
- MPA ta boga pa mas *parke* den e barionan, cu por fungi como un luga di encuentro pa e grandinan por topa cu otro y cu e hobennan. E sitio aki mester tin un *speeltuyn* pa mucha chikito por hunga. Asina e mayornan y e abuelonan por tira bista riba nan.
- Pa un persona, y en particular e mama soltera, por haya mas oportunidad den e mercado laboral mester *amplia e cuida di e yiunan* . Mester introduci un sistema moderno, pero socialmente factibel, pa cuida nos yiunan ora cu nos ta na trabou. MPA su solucion ta e plan "*Formacion di un Generacion*" , cu lo pone cu nos yiunan lo wordo cuida te cu 5.00 di atardi. Lo amplia mas despues riba e plan "*Formacion di un Generacion* ."
- Pa e menor cu ta bay *crèche*, mester implementa e Ley di control di Cuido y Guia di mucha, pa garantisa cu e cuida y guia ta profesional.
- MPA kier introduci un sistema na unda un persona cu ta paga *crèche* mensual, lo haya un *reduccion via belasting* . Door di esaki su gastonan lo baha.
- Aruba ta un pais multi-cultural. Nos tin hopi *imigrante* . Nos tur tin cu biba hunto y respeta otro. MPA ta di opinion cu e imigrantenan tin cu wordo stimula pa *integra den nos comunidad* sin perde nan mesun cultura, door di siña nos cultura, idioma, custumber, norma y balornan. Nos tin cu eleva y proteha nos mesun cultura y stimula aceptacion di esaki for di otronan. Nos tin cu bira un pueblo uni. Integracion lo trece harmonia bek na Aruba.
- MPA ta kere cu mester inicia un *fondo pa pensioen adicional* . Esaki lo conta pa tur hende cu ta traha, specialmente den sector priva. Lo mester haci un estudio di e porcentahe cu e doño di trabou y e trahador lo mester contribui na e fondo aki.

## A. NOS FAMIANAN

*Nos comunidad ta existi awendia di diferente famia hunto. Banda di e famia tradicional, na Aruba nos tin hopi famia cu ta consisti di un mayor so. Y nos tin e famia cu ta casa pa di dos biaha. E famia tin yiu hunto y hopi biaha cada partner tin nan yunan di e relacion anterior. Tin biaha nan ta biba hunto so. Nos famia nan ta multidimensional. Cu e desaroyo nos comunidad a cambia y mester duna nos famianan tur sosten necesario. Mester fortalece nos famianan y pone atencion special na nan.*

- MPA ta boga pa bin cu un instituto cu ta enfoca solamente riba *fortificacion di e famia* . E instituto mester duna guia pa e problemanan y e consecuencianan di relacion: separacion, divorcio, financiero, adiccion.
- E instituto lo mester tin un departamento separa pa yuda e famia cu nan problemanan financiero, cu programa pa re-educan nan con pa spaar placa y consolida tur nan debenan.
- MPA ta boga pa un estructura y programa adecuado pa combati *adiccion* . Lo busca afiliacion cu institucionan cu ta traha contra adiccion, cu lo duna sosten y guia na Aruba pa e adicto. Lo encera combatimento di tur sorto di adiccion manera droga, alcohol, wega di placa, wega di computer. Actualmente no tin suficiente sosten pa e famia por bay pa haya ayuda riba e tereno aki.
- Mester implementa e *ley di proteccion contra violencia domestico* di MPA. Ta necesario pa combati violencia domestico y proteha tur victima sin distincion. Kiermen hende muher, homber, mucha y e grandinan. E ley lo trece cu e famia por keda den cas y e abusador mester sali. Esaki lo evita cu e violencia lo escala. Mas ainda mester bin cu programa pa agresion pa e abusador, pa e por cambia su bida.
- MPA tin den e programa diferente accionan cu pa fortalece e famia door di dun'e mas tempo pa su famia, p.e. cambia horario maximo di 48 pa 44 ora, part time.

## B. NOS GRANDINAN

*Aruba su generacion di e grandinan ta creciendo rapido. Esaki ta 11% di e poblacion caba. E grandinan ta yega na un edad cu nan no por traha y mantene nan mes. Tambe nan ta bira hopi dependiente di otronan, pasobra físicamente nan no tin e habilidad mas pa por haci tur cos. Ora un grandi mester di cuidu y tin cu bay den un centro pa nos grandinan e ta keda leu di su famia. Mester percursa cu tin un cuidu digno pa nos grandinan, ya cu nan no por yuda cu nan a bira dependiente di otronan.*

- Mirando e proceso di envehecimento, MPA ta kere cu mester investiga y introduci un *plan structural* pa atende e desaroyo aki.
- Adapta e pensioen cu *Afl. 105,00* mensual manera acorda despues di e welga.

**- Mester *stimula* e pensionado pa ta mas *saludabel* pa e por keda traha ainda despues di su pensioen. Esaki lo trece pa e pensionado independencia financiero y lo nan tin un bida cu mas calidad. E por ta productivo den nos comunidad y yuda asina soluciona e scarsedad di trahador cu tin.**

- Mester prolonga e posibilidad di e grandinan pa nan por keda *mas largo* posibel *cerca nan famia* prome cu nan mester drenta un cas di anciano. Esaki ta posibel si ta amplia e cuidu na cas door di sostene e organisacionnan manera Wit Gele Kruis cu ta duna e *servicio ambulante* (thuiszorg) na nos grandinan cu ta rekeri ayudo y cuidu.

**- MPA ta boga pa bin cu *cas di cuidu pa nos grandinan den otro bario* manera Noord, Santa Cruz, a base di estudio, pa e famia por ta mas cerca di nan ser keri. Esun di San Nicolas mester wordo *renoba y amplia* . Esaki lo percursa cu e lasonan cu famia no ta bay perdi.**



- Pa *salba pensioen AOV* mester sostene un esfuerzo pa yega na palabracionnan concreto y structural cu ta garantisa nos pensionado cu un entrada.
- Revisa e pensioenverordening: Tin situacion na unda e *AOV* ta menos ora e persona a biba aña pafo di Aruba. MPA kier cambia y coregi esaki pa e periodo di studia den e stranheria na cierto condicion. Tambe mester investiga e situacionnan di e persona cu a biba pafo y lo ricibi AOW cu 65 aña di Hulanda.
- MPA ta kere cu mester inicia un *fondo pa pensioen adicional*. Esaki lo conta pa tur hende cu ta traha especialmente den sector priva. Lo mester haci un estudio di e porcentahe cu e doño di trabou y e trahador lo mester contribui na e fondo aki.
- MPA ta boga pa *activa e centro di bario* existente pa nan por ta un centro di pasadia pa nos grandinan. Asina e grandi por keda den su bario y cu su conocirnan en bes di ta cera na cas. Esaki lo alivia e famia tambe cu por laga e grandi pa dia of mitar dia na e Centro di Bario. E costo mester ta pagabel. Asina e grandinan tin mas posibilidad di actividad y recreacion.
- E programa di *Pasadia* pa nos grandinan por wordo introduci na tur centro di bario existente, na clubnan of na edificionan no den uzo den cada bario
- Gobierno mester sirbi como e apoyo pa e programa di Pasadia na unda cu lo por pone un *trahador social* disponibel. Tambe e hobenan cu ta cay bou di e Sociale Plicht menciona por ehrece trabou aki.
- Yuda esnan di menos recurso den *reconstruccion* pa haci nan casnan adecuado pa ancianonan/grandinan y esnan fisicamente incapacita, pa asina e grandinan por keda den seno di famia mas tanto posibel.
- Wit Gele Kruis y e otro organisacionnan cu ta duna *ayudo ambulante* lo haya e medianan y sosten necesario pa realisa e sistema di grandinan den nan mes hogar.
- Pa esnan cu esey no ta posibel, mester traha cas pa Grandinan na San Nicolas, Sta. Cruz y Noord tambe.
- MPA ta boga pa drecha e poder di compra di e pensionado, ya cu e pensioen riba su mes no ta suficiente.
- MPA ta boga pa por logra cu cada pensionado cu mester lo por uza un rolstoel pa su propio uzo.
- Lo tene cuenta cu e situacion di e pensionado den e fundacion di utilidadnan pa cuenta di awa y coriente.
- Mester re-evalua y re-estructura e sistema di cuida en general. Den esaki mester pone mas atencion na e necesidad di persona cu Alzheimer.
- Mester re-evalua e posicion di e trahadornan den e seccion di cuida di grandinan y di otro persona.
- Ta di importancia, mirando e crecemento rapido, pa anticipa e *demanda pa trahadornan* den e sector aki. Gobierno lo mester traha un *plan* pa por cumpli cu e demanda den e sector aki.
- Mester percura pa tin un pensioen adicional posibel pa e trahadornan.

### C. HUBENTUD

*Mucha y hoben ta nos recurso natural pa continuacion di nos comunidad y nos pais. Nan ta nos fundeshi. Nan ta esun mas vulnerabel den un comunidad. E impacto economico a causa cu nos mama y wela ta traha. Kiernen cu nos yunan mayoria bes despues di scol mester keda un otro caminda of nan ta keda nan so na cas. E sistema di "safety net", un red di seguridad, pa nos muchanan, famia y bario a disparce.*

*E falta di atencion ta trece cu e mucha/hoben ta busca e atencion otro caminda. Alcohol, droga, embaraso hubenil, dropout y e resultadonan na scol ta baha. Nos tur ta consciente di e problemanan y e peligernan. Ora un mucha dropout ya su futuro ta determina. Su oportunidadnan ta menos y e chens ta grandi cu e lo haya su mes den*

*problema cu husticia. MPA kier evita esaki. Nos slogan ta:*

*"Cu un diploma den bo man, bo futuro ta segura."*

P'esey pa MPA e mucha ta tuma un parti importante den e plan du Un Comunidad Nobo yama **Formacion di un Generacion**. Inversion den nos muchanan y nos hobennan lo minimalisa e problemanan social y asina baha e gastonan di gobierno pa cu problemanan di adiccion na droga, alcohol y wega di placa. Enseñansa y educacion y formacion ta e herment mas importante pa crea oportunidad y garantiza un futuro pa nos yunan.

**"Ta tuma un comunidad pa lanta un mucha"**

***PA ta kere den duna nos hobennan e recursonan necesario pa nan por logra nan metanan educativo como tambe nan metanan personal, pa asina nan por aporta constructivamente na bienestar di nos pais.***

MPA lo realisa esaki cu e siguiente plannan y puntonan:

- ***Formacion di un Generacion***

MPA lo bin cu un plan yama "*Formacion di un Generacion*" cu lo percura cu nos muchanan y hobenan lo wordo forma pa ta ciudadano sobresaliente.

- De e plan "*Formacion di un Generacion*" lo trece cambio den e horario di scol cu lo resulta cu nos alumnonan lo keda scol te 5.00.
- Mas ainda e alumnonan lo ricibi formacion adicional di nan mes como persona, riba e terenonan manera, cultura, historia, deporte, huiswerkbegeleiding, norma y balornan etc.
- MPA cu e plan "*Formacion di un Generacion*" ta proteha e menor contra droga, alcohol, combati embaraso hubenil, y lo evita cu e menornan di edad ta nan so na cas.
- E scolnan lo mester haya mas trahador pa e terenonan specifico. E trahadornan di traimerdia lo incorpora den e sistema nobo.
- Pa medio di e proyecto aki nos por garantiza un generacion cu norma y balor.

- ***Duna tempo na bo sociedad.***

Banda di esaki MPA kier institui un proyecto "*DUNA TEMPO NA BO SOCIEDAD*". Esaki ta encera, cu den mercado laboral lo institui un sistema di contribucion di tempo na e sector social door di hoben cu ta nenga di bay scol (dropouts). Esaki lo ta un obligacion social (sociale plicht). Nan tin e opcion pa bay traha na un institucion social cu ta trata cu nos grandinan, cu nos hendenan special y cu nos muchanan.

- E proyecto di "Pasadia pa nos grandinan" menciona mas despues mes por ta uno na unda cu lo por instrui nan pa un cantidad di ora mientras cu nan ta traha pa yuda un otro cantidad di ora.
- Por expande e proyecto aki den e sector priva tambe. E positivo di esaki ta, cu despues cu e hoben a siña con pa haci un trabou pa un periodo stipula, na unda e lo a realisa e balornan di bida y responsabilidad. Esaki ta e prome paso pa e keda motiva pa traha pa su futuro y evita cu e ta keda riba caya sin diploma den su man.

- ***Centro di yudansa pa Hubentud***

Segun MPA ta importante cu ta establece tambe un "*centro*" pa e muchanan problemático, pa guia nan riba bon caminda pa asina preveni cu nan ta cay den man di husticia. Actualmente no tin un luga caminda un mayor por manda su yiu

problematico y mester warda te ora e cay den man di husticia. MPA kier evita esey.

- E centro tin como meta pa forma, re-educar (norma y bator), siña e hoben cosnan practico, p.e. con pa anda cu peer pressure etc., disciplina (duna estructura) y prepara e hoben pa resocialisa (bay bek den comunidad).

- Seccion di Rehabilitacion: ta pone un time-out, trata y guia e hoben cu mester haci servicio/tarea comunitario.
- Seccion di psiquiatria: tratamiento psiquiatrico profesional di e estorbonan di conducta y otro estorbonan di personalidad.
- Seccion Bootcamp: cu instructornan entrena pa disciplina e hoben pa prepara nan pa fungi y traha den sociedad.
- Ta esencial pa duna guia na tur departamente cu ta traha cu nos muchanan y hobenan manera Reclassering, Barrio Regisseurs, Voogdijraad y Sociale Zaken etc. Tambe nan tin cu ta involvi den e tratamento y nazorg di nos muchanan y hobenan.

- **Centro di Hubentud**

MPA lo boga pa bin cu un Centro pa Hubentud den tur bario. Por usa e centro di bario pa esaki. Na e jeugdcentrum e hoben por diverti su mes cu su amigonan. Asina e hoben por desaroya su mes na un manera sano y lo evita cu nos hubentud lo ta riba caya.

- Pa e hoben cu a haya su mes den man di husticia mester pone Opvoedingsgesticht funciona como debe ser. Mester duna sosten y guia pa asina rehabilita y re-educar e hoben pa e por tin un futuro. Pa logra un maneho integral pa e delincuentenan hoben, tur instancia mester traha hunto, manera polis, HOH, trahadornan social, voogdijraad, scol, ministerio publico.

### **General**

*E falta di atencion ta trece cu e mucha/hoben ta busca e atencion otro caminda. Alcohol, droga, embaraso hubenil, dropout y resultadonan na scol ta baha. Nos tur ta consciente di e problemanan y peligernan. Ora un mucha dropout ya su futuro ta determina. Su oportunidadnan ta menos y e chens ta grandi cu e lo haya su mes den problema cu husticia. MPA tin e siguiente accionnan.*

- MPA ta hay'e di importancia cu mester percura pa tin *investigacion* riba diferente di e *problemanan* di e hobennan of entre e hobennan. P.e. embaraso hubenil, gangnan y adiccion.
- MPA lo introduci, mas pronto posibel, e ley pa cambia e edad pa consumo di bebida alcoholico di 16 pa 18 año. E bendedor lo wordo teni responsabel pa benta di alcohol na menor di edad.
- MPA lo *combati* tur tipo di *adiccion* cu un estructura y programa adecuado. MPA tin cu conscientisa nos hobennan mas ainda riba e peligernan cu droga y alcohol tin riba nan persona y nan famia. Lo busca afiliacion cu *instituto* di adiccion pa tene e sosten y guia na Aruba pa e hoben y mayor. Lo encera combati tur sorto di adiccion manera droga, alcohol, wega di placa, wega di computer. Mester enfatisa mas ainda riba prevencion entre pa nos hobennan na scol.
- Ataca e problema di *embaraso hubenil*. Mester maximalisa e informacion pa hoben, mayor y educador. Mester preveni pa e hoben sali na estado. Mester ehecuta e ley cu ta proteha un menor bou di 15 año contra relacion sexual. Mas ainda ora cu di investigacion a Sali na cla cu 80% di e embaraso hubenil a wordo causa door di hende homber di 25- 50 año di edad.
- E instancianan cu ta traha pa hubentud, particularmente pa e gruponan di hobennan cu ta dedica nan tempo den e actividadnan despues di school, mester wordo encurasha. Nos hobennan mester wordo balora pa nan logronan. Den e cuadro aki MPA kier institui un *sistema di honor*, den cual nos hobennan exitoso lo wordo nomina y honra.
- MPA ta di opinion cu mester encurasha nos hobennan cu ta destaca academicamente pa nan bay studia y pa bin bek y aporta na Aruba su desaroyo. MPA ta pensa pa institui un *beca estudiantil di honor* pa e hobennan cu ta destaca mas academicamente. Den e concepto di MPA e hobennan aki lo ricibi un beca ful paga, bou di e condicion cu lo sigui e progreso di estudio di cerca y na momento cu nan caba nan studio den e termino di e estudio, nan lo regresa Aruba y

percura cu nan lo tin un cupo di trabou.

- MPA ta di opinion cu nos hobennan cu kier drenta mercado laboral mester por conta cu un *salario* minimo pa nan grupo en particular. P'esey MPA ta boga pa un *klase-indeling* pa loke ta *salario* minimo.
- MPA ta boga pa duna nos hobennan contacto directo cu e representantenan di pueblo. MPA ta apoya y sostene e parlamento hubenil. MPA ta di opinion cu e parlamento hubenil mester tin lasonan mas estrecho cu nos gobernantenan. Den asuntonan hubenil Parlamento mester *pidi e conseho di Parlamento Hubenil* .
- MPA ta di opinion cu tin un edad pa tur cos. Un hoben bou di 18 aña no mester ta laat riba caya. MPA ta boga pa un "teen watch program" caminda lo por bay institui un " *curfew* " pa cierto edad. Ora cu e "curfew" wordo pasa e consecuencianan lo ta pa e menor y tambe pa e mayor.
- MPA ta kere den nos hubentud. Eventonan sano pa hubentud mester wordo encurasha y mester wordo facilita pa nos hobennan. MPA ta boga pa *elimina e uzo di alcohol* na actividad publico pa hubentud, pa asina garantisa cu e evento lo ta uno sano. Mester activa y revitalisa e centronan di bario, cu mester ta un luga pa e hobennan topa otro fuera di scol y diverti na un manera sano. Mester ekipa e centronan di bario pa nan por ofrece diferente tipo di diversion.
- MPA ta kere cu mester bin cu un *sistema entre enseñansa y comercio* , na unda ta garantisa cu e hoben ta haya trabou ora e caba scol y ta evita asina cu mester importa extranhero pa haci e trabou aki. Esaki lo mester conta pa e hobennan cu ta caba scol na Aruba mes y tambe den exterior.
- Sostene y structura *institucionan* cu ta traha cu *mucha y hoben* manera Imeldahof, Casa Cuna y Cas pa Hubentud.

[Back to Top](#)

## 2. SECTOR DI ENSEÑANSA

***Mucha ta nos unico recurso natural como pais. Y educacion ta e fundeshi di e nivel di nos pais. Educacion ta duna e personanan oportunidad pa nan por logra nan metanan den bida. P'esey educacion ta prioridad pa MPA. E no ta depende di un persona so y e mester ta structura.***

### **• MPA TA KERE CU CUIDO DEN ENSEÑANSA TA PRIORIDAD**

- Cuido pa alumno di scol
- Cuido pa e maestronan di scol
- Cuido pa infraestructura fisico di scol

### **MPA ta logra esaki door:**

#### **General:**

- Pa garantisa enseñansa mester *aloca* y aporta e recursonan necesario pa mantene esaki riba un nivel halto. Mester ta directamente conecta cu e budget di enseñansa segun e standardnan internacional (*6% di GDP* ) pa enseñansa ser aplica. Esey lo trece cu ne cu educacion ta garantisa y no ta depende di e gobierno cu ta sinta.
- Enseñansa ta primordial y mester traha y *plania* den un sistema cu ta nan locual ta e necesidadnan di e scolnan, e maestronan y e studentenan.

- Mester percura pa banda di e maestronan di scol lo tin cuida specialisa pedagogico, academico y social den nos scolnan ( *remedial teacher* ). E profesional por atende e problemanan specifico cu e maestro no ta prepara p'e. E problema ta wordo detecta prome pa un persona cualifica cu por identifica e problemanan di mucha. Asina ta yuda e mucha pa e no keda atras na scol.
- MPA ta para pa un *mihor preparacion y guia profesional* continuo na e *maestronan* , pa asina enfrenta e problemanan a consecuencia di innovacionnan den enseñansa basico y otro tipo di enseñansa y e problemanan social, entre otro financiero, divorcio, falta di atencion y motivacion.
- MPA ta para pa amplia e cuida y ayudo social, esta trahador social y jeugd gezondheidszorg, segun e necesidad y grandura di e scol.
- MPA ta para pa hiba un maneho caminda eheccion di e *cambio* nan den enseñansa ta solamente posibel si e preparacion prome, durante y despues ta garantiza esaki. MPA ta para pa vigila di cerca tur eheccion di e cambionan den enseñansa y brinda ayudo pa remedia e problemanan complica cu esaki a y ta trece cu ne.
- MPA ta para pa trece mas uniformidad den e mundo diversifica di *norma y balor* na Aruba, cu e meta pa enseñansa por prepara e futuro alumno miho.
- MPA ta para pa trece mas *uniformidad* den e mundo diversifica di *tecnologia* na Aruba, cu e meta pa enseñansa por prepara e futuro alumno miho. MPA ta haya cu ta di importancia cu cada mucha por *domina un computer*.
- Enseñansa *secundario/ middelbaar onderwijs* mester wordo completamente *computerisa* . Otro paisnan ta intruciendo esaki pa e alumno por tin e material necesario mesora na su disposicion y asina ta yuda baha e gastonan pa scol, estudiante y mayor.
- Mester mehora e calidad di enseñansa en general, pa asina sirbi e interesnan pa hisa e *nivel* cu ta bahando. Solamente 9% di nos poblacion din un educacion hbo/universitario. Casi 75% di comunidad di trahador na Aruba tin un nivel di enseñansa di solamente EPB/mavo.
- Haci un estudio di e origen di e aumento di e cantidad di estudiante na Aruba, cual ta pone cu planificacion den enseñansa ta dirigi directamente segun e necesidad y cu inversion ta wordo haci segun prioridad.
- Reanuda e Prisma project pa prepara e yiunan di e imigrantenan.
- MPA ta di opinion cu e *Prisma project* mester ta aplicable pa e alumnonan di Aruba tambe.
- Bin cu un maneho cu ta muestra e relacion entre e *necesidad laboral* den futuro y e tipo di educacion cu esaki ta rekeri cual educacion mester wordo stimula. Esaki mester bay den cooperacion cu sector priva.
- Mester bin cu un planificacion pa contra aresta escases *di maestro* .
- Mester hisa e *nivel* di educacion di e maestronan. Ta crucial pa e maestro *domina e idioma di instruccion* , pa asina e alumno tambe siña esaki miho.
- Pone prioridad na educacion primario, esta kleuter cu basisschool, pa motibo cu nan ta un grupo margina den enseñansa. *Primario, kleuter cu basis, mester di ayudo imediatamente*.
- Klasnan mester wordo manteni te na *25 alumno* cu ta un norma internacional acceptabel.
- MPA lo bin cu un plan yama "*Formacion di un Generacion*" cu lo percura cu nos muchanan y hobennan lo wordo forma pa ta ciudadano sobresaliente.
- Den e plan "*Formacion di un Generacion*" lo trece cambio den e horario di scol cu lo resulta cu nos alumnonan lo keda

scol te 5.00.

- Mas ainda, e alumnonan lo ricibi formacion adicional di nan mes como persona, riba tereno manera, cultura, historia, deporte, huiswerkbegeleiding, norma y balornan etc.
- MPA cu e plan "*Formacion di un Generacion*" ta proteha e menor contra droga, alcohol, combati embaraso hubenil y lo evita cu e menornan di e edad ta nan so na cas.
- Scolnan lo mester haya mas trahador pa e terenonan specifico. E trahadornan di traimerdia lo incorpora den e sistema nobo.
- Pa medio di e proyecto aki nos por garantiza un generacion cu norma y balor.
- *Enseñansa obligatorio (Leerplicht)* mester wordo introduci riba termino cortico, pa asina garantiza e formacion di TUR mucha.
- Mester bin cu un plan pa baha e cantidad di *drop-outs* . MPA su proyecto *DUNA TEMPO NA BO SOCIEDAD* (sociale plicht) lo yuda e hoben pa no keda cas haci nada door di oblige pa haci trabou comunitairo.
- Introduci maneho pa *Scol Saludabel* manera ta existi na Hulanda, pa garantiza fundeshi saludabel pa alumno y maestro.
- Apoya un programa pa *promove deporte* na scol, na unda cu tin persona califica pa hacie. Nos ta boga pa e personanan califica aki ta den e centronan di bario y na e clubnan deportivo tambe.
- Educa *sportleiders* pa *scol basico* y pa e centronan di bario y e clubnan di deporte. Tur scol mester tin un gym/sportleraar y gymnastiek mester ta un materia.
- Inyeccion financiero den *infraestructura fisico* , specialmente primario . Mester inverti caminda cu tin mester. Por ehempel hopi scol no tin gymzaal. Na Aruba tin un total di 78 scol preparatorio y basico. Un par di e scolnan so tin un gymzaal. P'esey nos muchanan no ta fisicamente den condicion.
- Mester implementa e *Ley di control di Cuido y guia di mucha* pa garantiza cu e cuido y guia ta profesional y riba un nivel adecuado.
- MPA ta apoya programa di "*educational training school*" riba e tereno industrial, pa asina prepara nos propio muchanan y evita pa importa hende di aforpa trabounan di por ehempel refinaria.
- Mester soluciona e problema di e *studentenan* cu a gradua den *exterior* , pa nan regresa Aruba pa por yuda e pais progresa. MPA lo evalua pa reintroduci e sistema di beca estudiantil pa atrae y encurasha regreso di nos profesionalnan hoben.
- Mester ofrece e *studentenan* di Aruba e posibilidad di *studia den e region*.
- Mester amplia *enseñansa pa adulto* . Door di esaki e adulto por desaroya su mes y tin mas oportunidad den e mercado laboral. Introduci educacion via television (Teleac cursus) y coopera cu Open Universiteit pa 2e kans onderwijs.
- Sector Comercial mester inverti den su trahadornan pa nan ta continuamente na *training/cursu* pa asina nan funciona y presta miho. Asina nos lo hisa e nivel di nos trahadornan.
- Gobierno mester duna e dunado di trabou cu ta prueba cu e ta *inverti den "human capital"* un tax credit/descuento di impuesto. E resultado lo ta cu e nivel di trahador y di servicio ta hisa.

Atencion special mester wordo duna na e hecho cu Papiamento no ta e lenga di instruccion ni e lengua di studia mas leu aki na Aruba y sigur no na Hulanda of un pais di habla Ingles.

Hopi estudiante ta faya pasobra nan no ta domina e lenga di instruccion.

Pero no ta e estudiante so mester domina e lenga di instruccion, juist e maestro, e educador, mester domina e lenga di instruccion pa e alumno por siña di dje.

P'esey mester mira cu e maestro su dominio di Hulandes y Ingles ta mehora den su propio preparacion como maestro/educador.

Antes e maestro tabata di habla Hulandes y esaki no tabata duna un problema asina grandi manera cu actualmente ta un di motibonan pa e alumno drop out.

Hulandes y Ingles mester ta obligatorio na e scolnan.

[Back to Top](#)

### 3. SECTOR DI DEPORTE

*Deporte ta e fundeshi pa un mente y curpa sano. MPA ta boga pa un comunidad cu ta haci mas deporte y cu tin mas movecion. E hubentud di Aruba mester ta mas involvi den deporte. Un persona cu ta practica deporte ta siña cualidadnan cu ta yuda e persona crece tanto mental como fisicamente y spiritualmente y asina den harmonia cu su famia y amistadnan.*

MPA kier logra un comunidad cu mas deportista y den movecion .

- Mester *restructura e maneho di deporte* y asina crea un cooperacion structura entre e diferente instancianan di deporte. MPA ta boga pa un ley cu ta fha e vision pa e maneho pa deporte.
- Mester bin un vision y maneho fiho na nivel gubernamental.
- Mester tin un *distribucion husto* di e *recurso financiero* entre e diferente asociacionnan deportivo y entre e diferente ramonan di deporte.
- E *fondonan di Lotto pa Deporte* y e entrada for di accijns ya existente mester wordo uza na un manera *obhetivo y transparente* . Lotto pa Deporte mester publica su cuenta anual. E organo di supervision di Lotto pa Deporte mester reflehata tur ramo di deporte.
- Mester apoya y percura pa tin mas " *exposure* " pa nos atletanan. Esaki tanto nacional como internacional.
- *Intercambio* local den deporte ta esencial pa crecemento di un atleta. MPA ta apoya esaki riba tur nivel cu ta engrandece e deporte y e atleta.
- Mayoria di e entrenadornan ta traha *voluntariamente* , p'esey mester institui un sistema di *recompensacion financiero* ora cu nan tin cu perde orario di trabou pa biaha pa deporte. Esaki ta conta tambe pa e atletanan cu ta traha den sector priva tambe.
- MPA ta apoya un ley di deporte cu lo ta husto y igual tanto den crecemento di talento atletico como ekipo y pa un infraestructura pa deporte rond di henter Aruba.
- Mester desaroya un sporthal/compleho di deporte ekipa na San Nicolas.
- Mester bin cu un maneho cu ta presicribi mantencion di tur compleho di deporte y e mantencion aki mester wordo presupuesta anualmente y e contribucion di Lotto pa Deporte mester wordo encera.

- Mester investiga e posibilidad di yudansa pa e electricidad cu ta wordo uza na e veldnan di deporte.
- *Construccion di e facilidadnan deportivo* mester ser haci den consulta cu e expertonan riba e tereno aki, ya cu por ehempel vloernan y veldnan di esakinan mester ta adecuado pa e condicion fisico di e atleta.
- *Deporte* mester wordo introduci na e *scolnan basico* den un forma mas serio y structura na unda cu e intercambio escolar den diferente ramo di deporte por ser fomenta dentro di nos hubentud efectivamente.
- Cada scol mester tin un *gymleeraar* y *gymnastiek* mester ta un vak.
- Mester *promove* entrenador y gym leeraar via beca special pa e esaki.
- *Cambia e ley cu ta concerni donacionan*, pa asina e asociacionnan di deporte por ricibi mas sosten financiero.
- *Cera cierto caminda* riba diadomingo pa asina stimula movecion.
- Ehecuta e Plan Nacional Aruba 2008-2018.

[Back to Top](#)

## 4. SECTOR DI SALUBRIDAD

*E programa di salubridad publico di MPA ta concentra riba cuatro aspecto cardinal pa sigura un cuida medico adecua pa un y tur. Na prome lugar, nos ta traha riba prevencion pa cada persona tin un bida saludabel y esaki consecuentemente lo yuda baha e mortalidad di nos pueblo ainda mas. Nos kier pa abo t'ey mas largo pa bo ta cu bo yiunan y sernan keru.*

*E di dos y di tres punto ta mehoracion y elevacion di e calidad di nos sector di salubridad publico. E pacient lo haya e derecho di busca su salud libremente y no ta wordo obliga di acepta un cuida medico limita. E di ultimo punto cardinal den nos programa ta innovacion, es decir, sigui y evalua desaroyonan internacional den e ramo medico y di salud en general, pa asina sigura un cuida medico al dia y eleva e calidad di bida di nos pueblo. Nos mester cuida nos salubridad publico y traha pa alcanza un salubridad publico cu ta funciona adecuadamente, uno duradero y sostenibel.*

### Cuida preventivo

MPA ta di opinion cu ta esencial pa bin cu un plan structural di prevencion pa e salud di nos pueblo. Cu e programanan di prevencion esaki lo trece cu nos pueblo lo ta mas saludabel, lo biba mas largo, tin un *bida cu calidad*. E lo yuda preveni malesanan manera diabetes, hipertension, cierto cancer, cardiovascula den nos poblacion. Esaki lo *baha e gastonan di AZV*. Mas ainda lo conduci na *hisa e productividad* laboral di nos trahadornan.

- MPA ta boga pa un *maneho structural y integral di prevencion*, cu ta enfoca riba nos pueblo y e malesanan comun na Aruba.
- MPA lo formula un *preventienota* na unda ta determina pa gobierno lo traha riba prevencion.
- MPA ta boga pa introduci un *preventiefonds* pa alocamento di placa separa pa por ehecuta un maneho di prevencion.
- MPA lo apoya y promove programanan existente di prevencion di *malesa* comun y cronico cu tin impacto riba e calidad di bida di nos pueblo. Por ehempel diabetes mellitus, problemanan cardiovascular etc.
- Den e cuadra cu e maneho preventivo aki lo informa continuamente na scol, television, radio, website etc. con pa preveni malesanan comun y cronico cu ta afecta nos poblacion.



- MPA lo apoya Wit Gele Kruis y otro institutonan den nan programanan di prevencion.
- MPA ta boga pa eheccion di un *Acuerdo di Signal* (Signaleringsprotocol) unda cu tur dokter di cas, na un forma rutinario pa medio di e " *huisenartsensentinel systeem* " lo colecta cierto informacion relevante, por ehempel indice di malesa contagioso/cronico, tipo di cancer, pa asina contribui na un miho un bista y control riba salud en general.
- MPA lo introduci e concepto di *Scol di Salud* (Gezondeschool) cu ta enfoca riba salud den su totalidad di e estudiante y maestro.
- Mas ainda, lo implementa *programanan* di *Scol pa Salud* na scol cu ta cuminsa desde crèche, unda lo introduci e concepto di cuminda *saludabel* , eliminacion di referesco na scol y stimula awa gratis.
- Tin un *Acuerdo di Signal pa Sobrepeso/obesidad* (Signaleringsprotocol) cu tur scol, na unda riba e prome dia di scol tur alumno lo wordo controla riba nan peso, altura, BMI, midi di cintura. Lo tin asina un bista di e crecemento di sobrepeso. Mas ainda por duna informacion na e alumno y nan mayornan ki paso pa tuma.
- MPA lo stimula mas persona pa sigui e curso di *Movencion y Salud* na IPA pa asina por educa nos muchanan con pa biba un bida saludabel.
- MPA lo ehecuta e *Plan Nacional Aruba 2008-2018* pa preveni sobrepeso y consecuentemente yuda preveni malesanan manera diabetes, hipertension, cancer, cardiovascula den nos poblacion.

Algun punto necesario:

- Bin cu un *campana nacional* pa conscientisa nos pueblo di e problema y duna guia y conseho con pa combati sobrepeso.
- Establece un *instituto* pa combati sobrepeso, na unda tur informacion ta disponible pa e pueblo. Tambe lo canalisa tur campana via di e instituto pa por logra di tin efecto mas grandi.
- Cubri tratamento di *dietista* bou di AZV, specialmente pa nos muchanan.
- Determina *protocol entre AZV* , instancia y persona den cuidado, dokternan, pa na un manera uniforme trata e problema di sobrepeso y obesidad.
- Amplia e posibilidad via AZV pa duna e pashent cu ta Obeso Morbido e oportunidad pa por haci *tratamiento quirurgico* .
- Duna *Wit Gele Kruis sosten* pa nan accion di control di salud di e trahadornan (prikacties).
- MPA lo stimula y promove e ley cu ta duna e posibilidad pa duna *lechi di mama* y pa por "kolf" na trabou.
- MPA ta propone pa uza parti di e *impuesto riba alcohol y tabaco* pa promove *cuido preventivo* .

### **Eleva y mehoracion di nos cuidado di salud.**

Pa eleva e cuidado di salud mester eleva e sector di cuidado. Esey kiermen tur sector. Asina e servicio medico duna lo ta mas miho. Pa logra esaki MPA ta boga pa lo siguiente:

- MPA lo promove y mehora e comunicacion interprofesional pa beneficio di e pashent. E *electronic health information technology* lo ta cardinal den esaki.
- MPA lo concentra pa soluciona e problema actual di e *tempo di espera* prome cu e pashent ricibi un cita cu un dokter of especialista.
- MPA lo amplia e servicio di e dokter di cas (1ste lijn) cu *enfermera specialisa* ( nurse practitioners) y *dietista* pa asina mehora e servicio na e pashent, alivia e peso di trabou di e doctor di cas y tambe stimula prevencion.

- MPA ta studiando e posibilidad di bin cu un *sistema* cu ta *garantisa cuidu* adecua y pagabel pa e personan cu tin mas mester di dje, cu ta personanan cu ta sufri di un malesanan cronico of edad avansa y cierto tipo di handicap.
- *Specialistanan* mester ser brinda e oportunidad pa por emplea un dokter di mesun specialisacion pa alivia e peso di trabou.
- Coopera y intercambia expertisio cu instancianan medico den region.
- Tur *servicio paramedico* (p.e. terapeutico, dietista) lo wordo *evalua* pa re-introduccion den AZV.
- Promove e vocacion di *enfermero* y promove e estudio local.
- Mantene nos flota di *ambulance* optimal y continuamente entrena y evalua e personal.
- *Amplia cuidu na cas /thuiszorg*. Introduci incentivo pa promove cuidu voluntario na specialmente e personanan cu ta ricibi onderstand. P.e. yuda den e centro di pasadia di nos grandinan.
- Mester re-evalua y *re-structura e sistema di cuidu* en general. Reevalua e posicion di e *trahadornan* den e seccion di cuidu di nos grandinan y otro persona. MPA ta boga pa establece e oportunidad pa un pensioen adicional pa trahadornan den sector di cuidu. Mester logra cu e demanda pa trahador den e sector aki ta wordo yena.
- MPA lo introduci programa cu ta duna informacion, pa sostene pashent (*patient hulplijn*) y cu den un manera structura lo brinda e apoyo profesional necesario pa e eerste opvang den caso di malesanan manera demencia/alzheimer, parkinson, cancer, depresion etc.
- MPA ta boga pa un Centro moderno geriatico pa *cuida nos grandinan*.
- MPA ta sostene un centro di diabetico y di obesidad.
- MPA ta sostene un centro cardiovascular na unda e calidad di e servicio na e pashent y rendabilidad di e clinica mester ta visibel.

### **Maneho di departamento di Salubridad.**

Departamento di Salubridad ta e instancia central pa por logra un maneho adecuado riba tereno di salubridad. Esaki mester encera un maneho structural riba tur tereno y specialmente riba tereno di prevencion. MPA ta boga pa e siguiente puntonan:

- MPA lo *reorganisa y ekipa* y profesionalisa departamento di Salubridad y pon'e traha optimalmente.
- MPA lo institui of re-evuala *programanan structural preventivo* riba diferente terenonan, specialmente malesanan cronico.
- MPA lo concentra pa *ekipa* e departamento di *inspeccion* pa traha optimalmente pa por combati malesanan cu tur aña ta presenta, manera dengue.
- MPA lo boga cu e sector di salubridad publico lo mester compli cu e *rekisitonan Internacional* preventivo pa garantisa nos salud.
- Lo pone inspeccion funciona pa asina tin *control structural* riba nos salubridad y implementa un sistema di calidad (Quality Assurance).
- Lo introduci y aplica e maneho di *HCAAP*.
- Revisa y actualisa e sistema di *evaluacion di diploma* di nos profesionalnan den cuidu di salud.

*MPA lo concentra riba e siguiente organonan den e sector di salubridad publico pa asina garantisa un salubridad publico cu ta funciona adecuadamente, uno duradero y sostenibel.*

## **AZV**

MPA ta consciente cu AZV ta coriendo defecit cu no ta aceptabel mas. Pa por realisa cu AZV lo keda existi mester percura pa lo siguiente:

- *Baha e gastonan di AZV door di e siguiente puntonan.*
- Mester profesionalisa e *administracion*, directiva y organo di supervision di AZV na tur nivel pa e instancia importante aki funciona eficientemente y responsablemente.
- Mester profesionalisa e *funcionamento di AZV* a base di *good governance* y segun e normanan di ISO pa asina AZV como instituto traha mas eficiente.
- Si ta necesario mester haci cambio den ley di AZV pa duna AZV un estructura sostenibel sin compromete e calidad di cuidado.
- Introduci "*Electronic Health information system*" cu lo duna un control eficiente y ta evita gastonan innecesario.
- Mester soluciona e problema di *e ancianonan* cu ta keda den Hospital pa cuidado. Esaki ta un suma di 2 miyon.
- Promove mas *cooperacion den region* na unda e gastonan ta wordo parti.
- *Gobierno* mester cumpli cu nan parti di "bijdrage" na tempo, cu ta anca den ley pa evita cu AZV lo tin un problema pa paga su debenan conforme e contractonan di cuidado.
- Evalua e lista di remedinan aproba "*positieve lijst*" y haci cambio unda cu ta necesario.
- Introduci *remedinan generico* caminda ta posibel y na un manera responsabel. E remedi mester ta procedente di paisnan cu ta tene nan mes na regla internacional di salubridad.
- Mester *hisa entrada* di AZV door di busca entrada adicional a base di otro forma manera, intercambio di expertisio medico, medical tourism y cooperacion den region.
- Mester *inspecciona e calidad y e servicionan* duna door di tur instituto cu tin acuerdo cu AZV, por ehempel door di institui un ciclo di audit, conduci pa inspectornan di salud cu ta controla Hospital y e otro instancianan, na un manera estructura y rutinario.
- Re-evalua e sistema relaciona cu e *specialistanan* cu mester cay awo bou di Hospital.
- Mester re-evalua e *stranheronan cu permiso* di estadia temporal lo wordo segura den e sector priva.
- *Stranheronan pensionado* cu a bin establece na Aruba mester di seguro priva.
- Amplia e posibilidad pa por cera seguro priva pa gasto adicional.

## **Hospital y IMSAM**

- MPA lo stimula *transparencia* den e maneho di Hospital y IMSAM. Lo mester garantisa *sistema di keho* ta un procedura obhetivo y tuma e pasonan necesario pa optimalisa e servicio di Hospital y IMSAM.
- MPA lo stimula of institui procesonan cu lo yuda trece *transparencia y controla* hospital y otro entidadnan cu ta duna cuidado na pashentnan riba e *servicio di cuidado* cu nan ta duna. Esencial ta cu e controlador (inspector) no mag di tin ningun funcion den e institucionan.

- Mester *evalua* cua instancia ta mas apropiada pa maneha Centro Medico Dr. Rudy Engelbrecht na un manera profesional y sin conflicto di interes.
- Mester promove e *trabou di enfermero* y mira pa e vocacion aki tin su aprecio cu e merece.
- Mester garantiza cu riba tur seccion den Hospital tin enfermero certificado y ta cumpli cu e *requisitonan Internacional*.
- En general mester stimula y haci posibel pa haya mas hende local pa ocupa e trabounan na hospital y den cuidado en general.
- Mester renoba, modernisa y expande e hospital, pa por yega na un servicio medico profesional y eficiente cu lo sigui yuda eleva e nivel di cuidado. Ya actualmente un hospital ta den mal estado y un hospital nobo no ta factibel segun rapport.
- Mester tin un maneho di hospital na unda e dokternan por trece nan pensamiento dilanti den un forma mas estructural (*profesional input*). Esaki lo yuda na yega na un programa di garantia di calidad (*quality assurance*).

### **Innovacion den e sector di salud**

*MPA como un partido cu un vision pa futuro ta reconoce e importancia di trece innovacion den e sector di salud. E mundo di ciencia y medicina ta uno hopi dinamico unda tecnologia, tratamentonan nobo y descubrimientonan ta na ordo di dia. MPA lo kier pa den futuro e sector di salubridad publico ta refleho di esaki.*

- MPA su maneho lo sigui e *desaroyonan internacional* riba tereno medico y implementa local ta aplicabel.
- MPA lo stimula profesionalnan den e ramo di medicina y cuidado di salud en general pa por desenvolve nan mes den e mundo internacional di ciencia y medicina. P.e. door di tene seminarionan internacional den diverso ramo na Aruba y stimula autonnan local pa publica den revista regional y internacional.

[Back to Top](#)

## **5. SECTOR DI CULTURA**

*Cultura ta e suma di historia, tradicion, custumber, norma y balor di un pais. Cultura ta parti di e desaroyo di un pais. Cultura ta loke ta mara un pueblo na otro y ta loke ta funda y desaroya un pueblo pa bira un Comunidad Nobo. Riba e tereno Social Cultural, MPA kier pone atencion riba union y cooperacion entre e instancianan cu ta promove nos cultura. Tambe MPA kier conserva nos monumentonan historico pa e futuro generacion.*

E desaroyo di Aruba den e ultimo decananan tabata mas bien uno economico y cu a resulta den un estilo di bida individualista y materialista. Cultura no a haya mucho atencion siendo cultura ta e factor cu ta pone hende pertenece na otro y sinti uni como un pueblo cu e mesun interesnan. Cultura ta necesario pa por logra construi *Un Comunidad Nobo*.

- MPA kier yega hunto cu e organisacionnan gubernamental y no- gubernamental na un *maneho y desaroyo social-cultural*, sigur mirando e diversidad di hende cu a imigra na Aruba.
- MPA ta *sostene* e entidadnan cu ta traha duro pa promove nos cultura.
- MPA ta pa fortifica Aruba su *identidad colectivo*.
- Describi y educa e poblacion di nos *normanan y balornan* pa *Community building*.
- *Promove y stimula* tur hende y specialmente nos alumnonan/hobennan pa conoce e nificacion bon di nos *bandera, escudo y himno*.

- MPA ta kere cu ta importante pa amplia e infraestructura cultural p.e. localidad y ekipo.
- Hiba e actividadnan/expresionnan cerca e famianan/hendenan den nan *bario y na scol* , pa asina actividad cultural ta mas accesibel unda lo tin mas participacion y asina envolve e hubentud den e parti cultural.
- *Conscientisa e medionan di comunicacion* di e importancia pa sigui promove nos propio cultura y pone un cantidad di ora disponibel pa musica Arubiano.
- Sostene *organisacionnan* cultural voluntario cu profesionalnan.
- Optimalisa e *servicionan* di Archivo Nacional, Biblioteca Nacional di Aruba, Departamento di Cultura, Cas di Cultura, door di pone e medionan necesario disponibel.
- Promove e concepto di un *Museo nacional* .
- Inverti den un *cas tipico Arubano* y converti esaki den un lugar pa muestra e bida di nos antepasadonan na nos hendenan y na e turistanan.
- Crea un espacio unda *artista local* por exhibi nan arte permanentemente y declama nan poemanan.
- Introduci un incentivo pa yuda e artistanan y e organisacionnan cultural riba tereno administrativo.
- Bin cu programanan (foro, sport, video) cultural y educativo na e medionan di comunicacion. Traha *documentario pa educa nos pueblo di su propio historia* .
- Introduci *Papiamento na tur scol* como un materia y stimula uzo di Papiamento corecto den e medionan di comunicacion.
- Inclui e parti cultural den e curriculum escolar di IPA.
- Sostene *curso* di Papiamento y di nos historia pa nos hendenan y pa e *imigrantenan*.
- Pa integracion den nos comunidad mester bin un *maneho* cu programa *specifico pa e imigrantenan* siña nos idioma, cultura y historia. Organisa curso obligatorio cu e costonan ta wordo cubri cu sponsoring y 'lesgeld' door di e dunadornan di trabou.
- *Mester proteha y conserva nos monumentonan* historico pa nos futuro generacion. Mester aloca suficiente finansa pa por conserva y proteha esakinan.
- Mester implementa e *ley di proteccion di monumento*.

[Back to Top](#)

## 6. SECTOR DI FINANSA

### FINANSA PUBLICO

#### GENERAL

*Finansa Publico di Aruba ainda ta un problema serio. MPA ta kere den e filosofia cu si cos bay bon pa Aruba en general, henter e pueblo ta probecha, pero mester tin reparticion husto di e progreso. E ultimo aki no ta e caso ainda. Cu bon finansa publico, nos por yuda esnan den necesidad den nos comunidad, nos por mehora nos*

*educacion, nos salubridad publico, seguridad y proteccion, etc. Esaki pasobra gobierno lo tin placa pa inverti den e desaroyo. Pa nos finansa publico ta bon, e dos elementonan, entradanan y gastonan, mester ta den balance. Pa yega na esaki mester di un nivel di gasto di gobierno sostenibel.*

## **Na 2007 e Comision Nacional Pa Finansa Publico (NCPF) , instala pa gobierno, a entrega su rapport cu recomendacion pa restructura e estructura di gasto di gobierno. E comision a haya 7 area pa investiga y a muestra kico mester haci:**

- Determina e grandura di e sector publico y su futuro desaroyo: restructura e aparato gubernamental y su estructura di gasto;
- Evalua e nivel di gasto di gobierno cu e meta di determina un nivel adecuado pa gasto corriente y di capital;
- Evalua e nivel di entrada di gobierno cu e meta pa determina si su nivel ta aceptabel, teniendo cuenta cu un nivel adecuado di e gastonan di gobierno;
- Alcansa un presupuesto balansa/balanced budget den 2009;
- Consolida e debe di gobierno, incluyendo posibel futuro deficitnan anual cu e meta pa yega na un ratio di debe y GDP sostenibel y hustifica;
- Desaroya un set di regla pa responsabilidad fiscal, pa sigura dunamento di cuenta, claridad y disponibilidad di informacion, cu lo duna un set di criteria pa regularmente monitor e desaroyo di e posicion financiero di gobierno;
- Coordinacion di maneho monetario y di impuesto pa un sostenibel balansa di pago (balance of payments) di pa contene inflacion;

**MPA ta di opinion cu ta importante pa *ehecuta e rapport* . Cu posicion sano**

**di Finansa Publico gobierno por inverti den mehora e calidad di bida di su pueblo y**

**alabes guia e desaroyo social economico di e pais.**

## **ENTRADA DI GOBIERNO**

Entrada di pais Aruba ta bini pa mas cu 90% di impuesto. E resto ta bin di por ehempel erfpacht, leges, etc. Entrada di impuesto ta bin pa gran parti di e impuestonan directo, manera inkomstenbelasting, loonbelasting, grondbelasting y winstbelasting. E otro parti di impuesto ta bin di impuestonan indirecto, manera invoerrechten y accijns y desde 2007 di BBO. Cu introduccion di BBO a baha inkomstenbelasting, winstbelasting y invoerrechten.

### **Impuesto directo:**

Impuesto directo ta wordo administra door di Departamento di Impuesto cual 'Servicio di Impuesto y Douana', a wordo reorganisa, automatiza y estableci den un edificio nobo pa brinda miho servicio .

- Pa hisa e nivel mas di e servicio y eficiencia mester *entrena e personal* pa esaki traha *profesionalmente y cu experticio* .
- Ainda e cobransanan ta sali mucho laat.

- Esnan cu mester haya placa bek tin di warda mucho largo.
- Mester hisa e disciplina di e pueblo pagador di impuesto. Mester kita e demotivacion pa cumpli na tempo cu e debenan fiscal. Departamento di Impuesto mester dispone di e medianan pa mehora e *motivacion* di e ciudadanonan.

Un otro problema ta cu e sistema di impuesto ta demasiado *complica* . Esaki tambe ta stroba cumplimiento cu deber fiscal. MPA ta boga pa bin cu un tarifa unico di impuesto pa tur producto.

### **MPA ta ofrece solucion pa e situacion aki .**

1. MPA kier *mehora e funcionamiento* di e Departamento aki. E Departamento mester tin suficiente personal cualifica y di reputacion intachabel y integridad halto pa haci e trabounan y pa sigui mehora e servicio. MPA ta convenci cu si e Departamento di Impuesto funciona bon, e ciudadano ta cumpli miho cu su debenan. Asina Gobierno lo genera automaticamente mas entrada, sin mester di introduci medida.
1. MPA kier *simplifica e sistema di impuesto* : revisa ley cu un sistema simpel y transparente. E sistema nobo di impuesto mester ta comprendibel pa un y tur y cu e ciudadano mes por cana su caminda sin haci gasto. Mas ainda mester bin cu *un tarifa unico di impuesto* pa tur producto.

Cu e eficiencia aki Pais Aruba ta haya e *parti husto* cu ta toc'e na entrada di belasting, y na tempo, sin aumenta e tarifanan ni introduci medida nobo. E sistema automatiza profesional, cu personal capacita pa haci miho control riba e companianan, automaticamente, lo aumenta conscientisacion den comercio y lo elimina e fenomeno di evasion di impuesto.

### **Impuesto indirecto:**

Impuesto indirecto ta wordo administra door di Departamento di Aduana cu tambe ta parti di e 'Servicio di Impuesto y Duana '.

- MPA ta convenci cu mester *modernisa nos leyman di duana* y mester simplifica nan.
- Mester bin un *miho sistema automatiza* y modernisa pa por administra, controla y cobra e impuestonan aki.

Esaki ta haci cu no ta necesario pa aumenta e tarifanan di impuesto indirecto.

### **Sales tax**

Na 2007 a introduci *BBO* cu ta wordo administra door di SIAD. Esaki kiermen cu e enfasis ta cambiando di impuesto directo pa indirecto, locual IMF a recomenda 20 aña pasa caba, cu ta un desaroyo mundial. Awor e *turistanan tambe ta contribui* . MPA ta di acuerdo cu transicion pa un sistema mas indirecto, pero uno *responsabel y sostenibel* .

- MPA kier pa *evalua funcionamiento di BBO* despues di 3 aña: studia e metanan y si nan a wordo logra y e efectonan pa comunidad, inflacion etc.
- E analisis di *sterkte y zwakte (SWAT)* ta necesario pa determina si BBO ta e *sistema adecuado* of si mester cambia pa un otro sistema: p.e. *menos cumulativo of na frontera so of BTW* .

MPA ta convenci cu e entrada di gobierno, impuesto of otro fuente mester wordo administra, controla y cobra miho. E sistema mester ta *transparente*. Pa esaki Departamento di Impuesto mester funciona mas eficientemente. Unda ta necesario mester ahusta e leyman, pa asina trece un *miho balans* entre e suma cu e *ciudadano mester paga y locual e ta haya a cambio* . Pero, simplemente organisa e proceso di cobramento mas miho lo trece mas entrada pa caha di gobierno y lo haci introduccion di mas medida innecesario.

## **GASTO DI GOBIERNO**

E gastonan di Gobierno ta wordo administra door di Departamento di Finansa. E Departamento aki tambe mester wordo *profesionalisa* pa traha mas eficientemente.

MPA lo dedica hopi atencion na *rebaha e gastonan* di gobierno.

- Mester bin un disciplina fiscal mucho mas grandi den gobernacion, na tur e ministerionan.
- E empleado publico mester *hisa su productividad y eficiencia* y eherce tareanan cu berdaderamente mester.
- Mester introduci un departamento di Human Resources cu ta transparente na unda e posicion di e empleado lo wordo valua obhettivamente.

MPA ta pensa ariba e siguiente plan di accion riba termino corto:

- Unda por, mester *automatiza* mas tanto posibel;
- *Re-educar* e empleado publico pa haci otro trabou, cu actualmente no ta haya suficiente atencion, por ehempel, controla negoshinan (control di prijs);
- *Servicionan cu no ta necesariamente* servicio di gobierno, mester wordo haci door di otronan y no door di gobierno. Esaki lo wordo determina door di un kerntakenanalyse.
- Duna e posibilidad di parttime of menos ora. Esaki lo baha e gastonan, pero e productividad lo mester keda mesun cos.

Si e empleado publico duna miho servicio y cumpli miho cu su trabou, e entradanan pa gobierno ta aumenta. E plan di accion aki mester duna resultado riba termino corto. Dependiendo di e resultado di e plan aki, lo mester tuma un decision riba mas accion.

MPA su meta ta pa trece e total di *gastonan riba un nivel cu ta responsabel*. MPA kier evita, di tur manera posibel, pa sigui hipoteca nos Pais Aruba, pasobra esaki lo kiermen hipoteca e futuro di nos yiunan.

Incentivonan fiscal

MPA ta convenci cu ta necesario pa Aruba ta competitivo y atrae inversionistanan, tanto local como di exterior. Esaki lo mester contribui na diversificacion di nos economia.

Por brinda incentivo na esnan interesa den inverti aki, pero *no mas tax holiday, sino un sistema di tax credit*. MPA no ta kere cu ta necesario cu mester regala tur cos pa por inverti na Aruba. Mester tin un bon balans entre locual Aruba ta brinda na incentivo fiscal y locual e inversionista ta ofrece, cu mester ta algo innovativo. MPA ta kere cu mester explora tur posibel alternativa, cu no ta costa caha di Gobierno hopi placa.

Aruba mester inverti mas den profundidad y no den hanchura (diepte vs breedte investeringen). Pa diversifica economia mester di incentivo pa inverti den servicio nobo internacional di calidad halto (telecomunicacion, centro financiero, aeropuerto, kenniseconomie etc.).

**Mester evalua si por reintroduci *Investeringsaftrek* parcialmente y *vervroegde afschrijvingen* den cierto forma.**

[Back to Top](#)

## 7. SECTOR ECONOMICO



*E desaroyo socio-economico mester ta pa henter Aruba y duradero y sostenibel cu balansa entre infraestructura, medio ambiente, structura social, enseñansa, demografia, cultura, etc. Mester determina e Capacidad di Carga y tene cuenta cu esaki. Inversionnan ta pa diversifica economia y dirigi riba capital y no pa tin mas trahador (kapitaalintensief vs arbeidsintensief). E desaroyo mester ta planifica y no ad hoc. Maneho mester ta basa riba un maneho di desaroyo nacional, teniendo cuenta cu nos recursonan y posicion geografico. Crecemento sin mas ta contraproductivo. Den pasado nos no tabata prepara pa e efectonan di crecemento. Gobierno su tarea ta pa planifica y duna guia na desaroyo nacional; Gobierno mester hisa su inversion pa 2% di e GDP a termino corto (Comision NCPF).*

*Nos economia ta basa riba free enterprise, pero sin planificacion y control, esaki a sali for di man y a bira un free for all. Mester drecha e situacion aki.*

MPA ta apoya e iniciativa pa un vision pa Aruba. MPA ta sigui e desaroyo di *Nos Aruba 2025* di cerca y lo tuma e resultado na serio pa implementa, specialmente mirando cu e pueblo ta participa y contribui na e vision aki pa futuro di Aruba.

E decision di gobierno pa acelera crecemento di e economia door di otorga permiso pa mas hotel, time share y condominium no ta beneficia Aruba mirando su capacidad di carga. Mester reglamenta e desaroyo.

Mester diversifica nos economia pa nos no ta dependiente di turismo y petroleo. Kiermen diversifica nos turismo y diversifica nos economia. Mester stimula economia nobo y rebiba Zona liber.

Pa stimula negoshinan un sistema fiscal simpel na unda tin un solo tarifa di impuesto pa tur producto lo simplifica e administracion.

Den esaki mester atencion special pa e desaroyo di lugarnan cu a keda atras manera San Nicolas. Mester enfoca desaroyo na *San Nicolas* pa medio di *industria chikito*. Tambe mester stimula y promove negoshi chikito door di incentiva. Mas ainda mester stimula desaroyo di San Nicolas teniendo cuenta cu e identidad Caribense. Asina lo desaroya San Nicolas den un "*Carnival City*."

Tambe lo ta mas prudente pa *muda e waf pa Zeewijk* en bes di Barcadera ya cu e waf na San Nicolas ta apto pa por ricibi barco grandi. Lo no ta necesario pa coba den lama pa hacie mas hundo. Mas ainda esaki lo ta un incentivo pa San Nicolas.

Importante ta pa fortalece e negoshinan chikito y mediano. Ta importante pa duna sosten door di educa e propietario riba diferente tereno manera di administracion, finansa y ley laboral. Pa garantisa un nivel MPA kier bin cu cursonan pa *midden- y kleinbedrijf*. Mester bin cu un sistema cu ta duna mas informacion tambe di e economia di Aruba, kiermen cu ta publica cua tipo di negoshi ta satura na Aruba, pa evita cu un propietario ta cuminsa un negoshi cu chens chikito di sobrevivi.

Pa e maneho economico y di finansa publico ta esencial pa tuma e consehonan di SER, CBA, IMF, ARA, CAD y organisa CBS pa e estadisticanan necesario pa funda un maneho economico y financiero. Tambe mester bin cu un Bureau cu ta analisa e impacto economico y social pa gobierno.

### **MPA su accionnan pa maneho economico pa e termino corto ta:**

- Mester bin cu un *plan riba termino corto* pa garantisa un desaroyo balansa y duradero pa Aruba.
- Mester bin cu un *maneho di planificacion* pa determina e desaroyo economico pa 10 año. Den esaki mester ehecuta e Ordenanza di Zonificacion, ROP y bin cu e *bestemmingsplan*.
- Central ta pa *diversifica e economia* di Aruba y *no sigui amplia negoshi satura*. Mester diversifica nos economia, door di diversifica turismo existente y bin cu economia nobo.

- Mester bin cu un sistema cu ta duna informacion publico pa negociante sa cua sector ta satura.
- Esey ta trece cu ne cu mester *consolida turismo* . Nos isla no por carga mas turista, mas hotel, mas auto etc. Nos tin cu conserva loke nos tin.
- Mantene e *moratorium* di hotel, time share y condominium.
- *Calidad ta mas importante cu cantidad* . Mester bin cu un Ordenanza cu ta determina e grado, clase di hotel a base di cierto puntonan cu nan mester cumpli cu ne.
- E progreso mester wordo parti riba tur parti di Aruba. Atencion special mester wordo duna na *San Nicolas* y tur otro districtonan di Aruba pa explora nan propio potencial dentro di nan propio caracteristicanan.
- Mester cambia e estilo di e centro di San Nicolas pa e bira un atraccion carnavalesco. Mester desaroy'e den un Carnival City cu cooperacion di SNBA y e pueblo di San Nicolas.
- MPA ta boga pa muda e waf pa Zeewijk, San Nicolas, unda e waf ta mas apto pa ricibi barco grandi di container en bes di Barcadera. Mas ainda esaki lo duna un impulso economico pa San Nicolas. Mester wak e posibilidad pa Aruba bira un hub entre Latino America y Panama.
- Re-evalua y stimula Zona Liber na e waf nobo na San Nicolas.
- Pa diversifica e economia MPA ta boga pa diferente solucionan manera telecomunicacion, e-commerce, ITC, y comunicacion digital. Aruba por domina diferente idioma y lo por duna servicio mundial facil.
- Mester *promove* e sector *primario/agricultura* : destina areanan pa esaki. Stimula cultivacion di fruta y berdura y atrae inversion den chicken farm pa baha importacion di e productonan. Esaki lo haci Aruba independiente pa su productonan primario y stimula cuminda saludabel.
- Mester tuma paso den direccion di *energia alternativa* pa asina kita e dependencia economico a base di *petroleo*. Mas ainda esaki por bira un economia riba su mes.
- Investiga negoshi riba tereno di *recycling* manera di glas y di waste Management. Esaki lo diversifica y haci nos pais mas limpi.
- Pa stimula inversion mester propone un *tarifo unico di impuesto* pa tur producto. Tambe mester simplifica nos sistema fiscal pa stimula inversion den nos economia.
- Mester fortalece e negoshinan chikito y mediano door di duna curso riba terenonan manera administracion, finansa y ley laboral. Pa garantisa un nivel MPA kier bin cu cursonan pa *midden- en kleinbedrijf diploma* .
- Mester introduci of stimula fianza pa e *empresanan chikito* cu un seguro di credito. Podise via Volkscredietbank.
- No ta tur bario di Aruba mester desaroyo di negoshi y turismo, nan por ser desaroya den un forma moderno pa nos *comunidad* biba mas trankil y manera nos semper a custumbra na Aruba. Mester finalisa e *bestemmingsplan* riba termino cortico.
- MPA ta kere cu mester *sanea e forsa laboral* . Mester haci un estudio nobo den cua sector tin demanda pa labor y riba cua tereno tin labor di mas. E resultado di esaki mester ser haci publico y encurasha e pueblo pa considera alternativa den trabou. Mester *controla* despues si enberdad e cantidad di demanda ta cuadra cu e realidad.
- Mester educa nos pueblo desde hoben den diferente idioma pa asina amplia e posibilidad pa logra haya trabou.
- Establece un Bureau Central di Planificacion (Centrale Plan Bureau).

[Back to Top](#)

## 8. SECTOR TURISTICO

### *Turismo di Aruba "nos industria"*

*Turismo ta un industria cu ta rekeri hopi trahador y ta crea oportunidad di trabou directo y indirecto. Turismo ta e fundeshi pa negoshi chikito y mediano. Loke tur turista gasta na nos isla ta crea trabou directamente den hotel, cafe, restaurant, casino, compania di transportacion, y otro atraccion turistico, cu ta deal completo of parcialmente den e ramo economico aki. Mientras cu e dollar ta circula den nos economia, e ta crea posibilidad di compra (oferta) of gasto cu ta genera trabou den e otro sectornan. Asina Turismo tin un efecto multiplicador pa economia.*

Mirando e papel clave cu turismo ta hunga pa economia mester cuida y fortalece turismo mas ainda den e temporada di crisis aki. MPA ta para pa formula un *maneho sostenibel* pa turismo, pa salbuardia y crea cupo di trabou tanto den calidad como cantidad. Pa haci esaki MPA ta kere cu mester di un vision y boluntad pa ahusta, fortalece y trece cambio den maneho di turismo. Den e maneho total mester observa e interesnan di *medio ambiente* di Aruba. Medio ambiente ta forma parti di e productu turistico di Aruba.

Un industria turistico sostenibel ta nifica cu mester realisa tambe cu tin *limite na crecimiento* mirando e capacidad di carga, specialmente e mercado laboral di Aruba.

Ya caba ta bisto cu e capacidad di carga ta bou di hopi presion mirando e carga pa structura social, infraestructura, enseñansa, medio ambiente y mercado laboral.

Na comienzo di 2007 tabatin 7.500 camber di hotel y apartamento. Mirando e permisonan duna y e plannan pa e proyectonan hotelero, por proyecta cu e cantidad aki lo yega 12.000. 70% di nos turismo ta bin di Merca, 10% di Venezuela, 5% di Hulanda y 15% di resto di mundo. Turismo ta contribui directamente y indirectamente cu 70% na GDP di Aruba.

E cifranan aki ta muestra claramente e dependencia na e *mercado Mericano* di unda ademas casi 70% di e stoelnan aereo ta di e mercado aki. Dependencia na un unico mercado ta hopi fragil, cualkier eventualidad interno of externo por cambia y debelita e crecimiento turistico y asina stanca nos economia.

E desaroyonan ya ta indica cu e crisis mundial financiero y economico lo tin su efectonan riba turismo di Aruba. 70% di turista ta di Merca y ta net na Merca e crisis financiero a dal hopi duro y e riesgo t'ey cu e Mericano su poder di compra ta cay y cu nan lo ta mas cauteloso pa biaha pa entre otro Aruba. Cifranan di CBS y CBA ta muestra cu e suma promedio cu e turista ta gasta na Aruba a cay di mas cu Afl. 200,00 pa dia pa Afl. 175,00 pa dia.

Aruba su turismo ainda no a sinti e efectonan completo di e crisis.

MPA consciente di e riesgo actual y e debilidad inherente di e industria aki, ta mira e necesidad pa Aruba actua pa *fortalece y diversifica* su mercado turistico, mediante di;

- *Aerolinea Nacional* . Implementa incentivo pa atrae inversionista pa establece un aerolinea nacional na Aruba. Esaki lo yuda pa negocia cu e otro aerolineanan, nivela prijs di ticket, habri otro mercado y lo duna mas Arubiano trabou.
- Mester minimalisa e *dependencia* riba e aerolineanan di exterior pa e turista yega Aruba. E aerolinea nacional mester tin un base financiero solido y un gerencia y personal profesional. Pa e compania tin un base den comunidad di Aruba lo por habri e posibilidad pa Arubianonan inverti y cumpra accionnan den e compania. Mester exclui metemento politico y traha

solamente riba un base comercial y coopera cu un partner strategico.

- Lo revisa e *acuerdonan bilateral* cu diferente pais pa haci Aruba mas atractivo pa e aerolineanan. Tambe MPA lo traha directamente cu Aruba Airport Authority pa motiva e aerolineanan pa scoge Aruba como destinacion turistico. Haci *promocion y publicidad* pa atrae e aerolineanan y ofrece incentivo ora nan inclui Aruba den nan destinacionnan.
- *Consolida* e turismo door no sigui desaroya mas hotel, time share y condominium, pa mantene e nivel di turismo desea cu ta turista cu nivel di calidad cu ta gasta y un nivel di ocupancy halto.
- *Amplia e mercado* cu Aruba ta custumbra di promove. Deda esfuerso pa atrae otro tipo di turismo manera deportivo, *salud/medico*, cultural, convencion, congreso y reunion y eco-turismo.
- *Amplia e mercado di unda e turista ta bin*. Mester investiga y stimula airlift di otro pais cerca di nos manera na Latino America.
- *Atrae turismo di calidad* y p'esey mester mantene e cantidad di turismo cu tin. No mester amplia e cantidad di turista djis pa tin mas cantidad.
- Mester mehora e *producto turistico*. Mester mehora e *infraestructura*, calidad di servicio y en general prepara Aruba pa por crea y atrae e turista cu lo gasta na Aruba y dun'e calidad pa su placa. Importante ta pa haci *nos isla limpi* y manten'e limpi pa medio di un campaña nacional. Tambe mester inverti den e trahador pa e por papia diferente idioma.
- Lo ta ideal pa trece turista cu lo gasta mas na nos isla, manteniendo e cantidad di turista cu ya ta biniendo Aruba. Esey kiermen cu mester enfoca mas riba e entrada pa concepto di turismo en bes di riba e cantidad di turista cu ta yega nos isla.
- Mester diversifica nos producto tambe y den esaki mester desaroya e centro di San Nicolas como producto turistico " *Carnival City* ". MPA ta di opinion cu mester duna San Nicolas su mesun identidad, cu mester distingui di Playa. Den esaki San Nicolas mester converti su mes den un luga turistico cu tema Caribense. Kiermen musica, cuminda y bebida Caribense cu enfoca riba Calypso y Carnaval. E centro mester wordo adapta na esaki y mester duna iniciativa pa converti e centro. Den esaki e mester tin cooperacion cu San Nicolas Business Association y e pueblo mes di San Nicolas. Lo mester bin un *museo di Carnaval* na San Nicolas pa asina atrae e turista pa bin San Nicolas.

Maneho pa hisa nivel di e producto turistico;

- **Educacion:** Mas enfoca riba educacion den e ramo di turismo pa cu e trahador di nivel abou pa mediano, pa asina sigura cu por duna un *servicio di calidad*. Segun e estudionan haci pa CBS, ta muestra cu nos calidad di servicio ta bahando. Esaki ta entre otro consecuencia di e fluho di trahador inmigrante cu ta traha den nos industria turistico cu no ta *domina e cuatro idioma*, no tin experiencia den e ramo, no ta conoce e importancia di nos turismo y cultura hospitalario. Pa contra aresta e dificultad aki mester pone mas atencion riba educacion profesional y practico, mas curso, workshops y cooperacion cu instancianan manera Enseñansa pa Empleo. Den esaki e *dunado di trabou* mester asumi su *responsabilidad* pa e calidad general y e calidad di servicio di su propio negoshi y asina organisa entre otro inhouse training of otro manera pa su trahadornan domina e idioma cu e turistanan ta papia.

- **Fortalece acuerdo y cooperacion:** Ta importante pa fortalece e acuerdo y cooperacion cu *organizacionnan internacional* cu por yuda Aruba riba e nivel di educacion, planea y investigacionnan cientifico, manera CTO (Caribbean Tourism Organization), WTO (World Tourism Organization), WTTC (World Tourism and Travel Council), etc.

- **Crea un Tourism Task Force/Entidad Regulador:** consistiendo di AHATA, ATA y otro sector economico y di nos sociedad pa yega na un *strategia comun pa turismo*; manera *proteccion y mantencion di nos recursonan natural* particularmente nos atraccion turistico. Identifica y desaroya otro puntonan potencial pa atraccion turistico p.e. Seroe Cristal y mina di fosfaat. Planea y establece mecanismonan pa implementa y *controla norma* y e ley turistico, cu autoridad cu por cuid'e (p.e. Polis di Turismo). Esaki lo fortalece e union di sector priva y esun publico den un intento pa establece obhetivonan na mediano y largo plaso pa turismo. Un *Departamento di Control* lo implementa un control di *calidad* continuo y consecuente, no solamente pa e hotelnan sino tambe pa transportacion publico y e otro sectornan cu tin di haci cu

turismo. E control aki mester resulta den un estimulo pa e empresanan, scolnan, etc. pa educa y garantisa e producto di calidad y conserva nos medio ambiente.

Pa monitor e sector y pa un maneho solido y dirigi, mester haci un cost-benefit analysis periodicamente.

- *Programanan pa conscientisacion na nivel nacional* ;
- Programa di *Certificacion* pa e guianan, taxi, giftshop, joyeria.
- Workshop y seminario pa e *personanan* den e sector turistico.
- Reinforza y incentiva *hotel, restaurant* y e otro sectornan cu ta directamente den contacto cu turismo, pa ehecuta programa di entrenamiento, educacion y control di calidad.
- Sigui cu *reconocimento* di e personanan, compania y/of proyectonan cu ta sobresali den e industria turistico.
- Introduci *turismo* y conservacion di *medio ambiente* den e curiculo di *scol* na diferente nivel, p.e. scol basico y polis, imigracion, duana, etc. Trempa e muchanan mester sa e importancia di esaki.

Gobierno ta responsabel pa e maneho turistico. E task force menciona lo sostiene Gobierno den trahamento di e strategia di e maneho. Ehecucion di maneho a wordo haci exitosamente pa ATA conhuntamente cu AHATA, cual partnership MPA ta wak como positivo y lo percura cu e union aki permanence.

*Aruba Tourism Authority* cu ta ehecuta e maneho y asina ta maneha e mercadeo turistico di Aruba mester wordo independisa pa ATA pa por traha mas *autonomo*, cu menos burocracia y cu tur herment pa promovi promocion di Aruba den exterior. Pa e presupuesto propio mester destina parti di e entrada relata cu turismo, esta "*room and casino tax*" directo pa ATA. Asina ta sigura cu ATA ta funciona, administra y dirigi mas efectivamente. E personal di ATA y di e oficinanan di turismo rond mundo mester wordo continuamente profesionalisa.

E oficina principal di ATA na Aruba mester sostiene esunnan pafor di Aruba na un manera eficiente y profesional, pasobra nan ta cara di Aruba den exterior.

Na 2007 Aruba a ricibi mas cu 772,000 turista cu un ocupacion promedio di 76% di e cambernan. MPA lo boga pa un optimo y un capacidad di carga sostenible den Aruba su industria turistico, manteniendo e calidad y uzo di Aruba su naturalesa, cultura, social y historia. E obhetivo ta pa tin un balans entre desaroyo turistico y medio ambiente.

Teniendo na cuenta cu mas di 50% di nos turismo ta repetitivo, ta bon pa amplia e programa di fidelisacion, un club di "*embahadornan di buena voluntad*" pa asina nos voz rezona mas fuerte den mundo.

## **Aviacion**

*Aviacion ta garantisa e seguridad pa nos turismo cu ta e pilar di nos economia. P'esey mester duna importancia na aviacion, locual a wordo negligisha.*

- MPA lo zorg pa tur e *aparatonan di navegacion* na aeropuerto cu no ta funcionando wordo poni *den funcion* atrobe.
- MPA lo *stimula desaroyo* di aviacion na Aruba, tanto comercial como general.
- Mester haci un (*re*)-*evaluacion di nos leyman* vigente y adapta of cambia nan na unda esaki ta necesario, pa asina cumpli completamente tambe cu e normanan internacional.
- E proceso aki lo ta un di e puntonan, cu lo yuda pa stimula introduccion di un aerolinea y tambe yuda desaroya *aviacion recreacional* aki na Aruba.

- Mester sigui sondea e posibilidad di haci Aruba un "HUB" probechando asina di Aruba su posicion geografico favorabel.
- Tambe mester sigui *desaroya* e parti *pazuid* di nos *aeropuerto* specialmente pa aviacion general y commuters.

[Back to Top](#)

## 9. LABOR

*E desaroyo economico di Aruba a crece acelera e ultimo 15-20 aña y a pone presion riba e Mercado Laboral. Esaki a pone cu e demanda pa trahador tabata asina grandi cu mester a importa trahador di otro pais. Consecuentemente e poblacion a crece rapido di 60.000 pa 110.000 cu tur e consecuencianan: mas cas, mas caminda y auto, mas uzo di recurso natural. E poblacion ta bou presion door di e crecemento demasiado acelera door cu ya caba 40% di e poblacion no a nace na Aruba.*

*E recesion economico mundial actualmente ta disminui e crecemento temporalmente, pero mirando e proyectonan aproba door di gobierno atrobe lo mester importa 15.000 trahador. E biaha aki mester planifica e crecemento laboral adelanta, pa evita tur e consecuencianan social cu esaki ta trece cu ne.*

- MPA ta kere cu mester *sanea e forsa laboral* . Mester haci un estudio nobo actual den cua sector tin demanda pa labor y riba cua tereno tin labor di mas. E resultado di esaki mester ser haci publico y encurasha e pueblo pa considera alternativa di trabou. Mester *controla* despues si enberdad e cantidad di demanda ta cuadra cu e realidad.
- **Mester bin cu un maneho cu ta muestra e relacion entre e *necesidad laboral* den futuro y e *tipo di educacion* cu esaki ta rekeri. Mester publica esaki y stimula nos hobenan den e direccion aki.**
- Mester coordina e *desaroyo economico innovativo* cu e capacidad educacional cu tin. Si ta necesario mester *re-educar* y bin cu curso pa nos pueblo por tin e capacidad pa traha den e economia innovativo manera tecnologia.
- Mester analisa e informacion cu e *futuro forsa laboral* cu ta e studiantenan cu ta estudiando.
- Mester soluciona e problema di nos studiantenan cu ta studia afo, pa nan por regresa Aruba bek. Mester soluciona y evita e " *braindrain* ", sino nos mester keda importa trahador.
- Mester educa nos pueblo desde hoben den diferente idioma pa asina amplia e posibilidadnan pa logra haya trabou.
- MPA kier *reduci* e maximo di orario di *trabou* for di *48 ora pa 44 ora* pa siman kedando cu e mesun salario. Asina e trahador ta haya e oportunidad pa dedica su mes na su famia. Pero alabes e trahador ta bay dilanti den su salario door cu e ta ricibi e mesun salario trahando menos ora. E trahador ta haya oportunidad pa sosega y door di esey e lo ta mas productivo. Esaki ta nifica cu e *arbeitsongeschikt* lo baha.
- Departamento di Labor mester controla si e trahadornan ta *ricibi salario minimo* y cu no ta hunga wega pa paga stranhero poco placa. Esaki ta crea un mercado laboral barata y asina ta pone pueblo den un situacion precario.
- Mester stimula pa e *productividad di e trahador* subi. Esaki ta mas importante awo cu e recesion economico. Pa logra esaki mester bin cu un sistema siguiente:
  - programa nacional pa conscientisa y stimula productividad,
  - desaroya metodo pa midi, controla y maneha e productividad,

- bin cu programa cu e trahador por desaroya su capacidad.
- Mester di programa pa nos trahador y pa su lugar di trabou ta *saludabel*, pa asina e trahador por labora mas miho y mas largo.
- Stimula *pensionado* pa sigui traha. Esaki lo evita cu nos mester importa mas stranhero.
- Analisa y stimula e posibilidad di *parttime*. Alabes por stimula orario flexibel.
- Mester haci un estudio concerni e orario di trabou y orario escolar.
- Mester *evalua funcionamiento di LTU*. MPA lo haci cambio den e ley unda e situacion economico y social ta existi esaki. Pa continuidad mester wak si *prolonga permiso en bes di regreso obligatorio despues di 3 año*.
- Mester haci e proceso pa permiso di trabou pa stranhero mas *simpel y rapido* pa asina e trahador y doño di trabou sa rapido cual decision tin. Esaki lo trece seguridad pa e mercado laboral.

[Back to Top](#)

## 10. INFRASTRUCTURA & MEDIO AMBIENTE

*Gobierno a dicidi di accelera e desaroyo economico door di accelera e otorgamento di tereno. Esaki a pone cu tin un cantidad di proyecto pa hotel, timeshare y condominium otorga. Den bario tambe a accelera e desaroyo na unda e ta bisto cu no tin un maneho pa e desaroyo di Aruba. Den bario di cas actualmente tambe tin nightclub cu no ta cuadra cu otro. Trafico congestiona a bira un problema cardinal. Ya tin mas cu 58.000 auto na Aruba.*

*E crecemento accelera a pone tambe mas presion riba e medio ambiente. Pa un bida saludabel mester proteha nos medio ambiente..*

Pa e balans aki mester haci lo siguiente:

- Mester bin cu un *plan riba termino corto* pa garantiza un desaroyo *balansa* y duradero pa Aruba.
- Mester bin cu un *maneho di planificacion* pa determina e desaroyo economico pa 10 año. Den esaki mester ehecuta e Ordenanza di Zonificacion, ROP y bin cu e *bestemmingsplan*.
- No ta tur bario di Aruba mester desaroyo di negoshi y turismo, nan por ser desaroya den un forma moderno pa nos *comunidad* biba mas tranquil y manera nos semper a custumbra na Aruba. Mester finalisa e *bestemmingsplan* riba termino cortico.
- Mester implementa e *Ley di Zonificacion* cu ta destina area residencial y area pa actividad economico y industrial, parkenan y infraestructura.
- Mester tin mas transparencia den e otorgamento di tereno.
- Mester bin cu un planificacion pa soluciona e desaroyo di trafico. E cantidad di vehiculo cu tin na Aruba mirando su tamaño ya ta demasiado. Miho planificacion pa futuro ta necesario
- Mester bin cu alternativa mas eficiente pa un persona por mobilisa su mes, door di haci *transporte publico* mas atractivo. Mester investiga y studia e posibilidad di bin cu transporte publico a base di electricidad.
- Mester ehecuta e *ringweg* pa asina soluciona e problema di *congestion* na Royal Plaza. E *congestion* na Drive Inn mester

wordo soluciona cu un turbo rotonde.

- Investiga pa bin cu un caminda principal nobo.
- Mester inverti den e *calidad di e camindanan* . E camindanan na Aruba ta den mal estado y no tin suficiente mantencion.
- Mester kibra e *monopolio* actual di e compania cu ta traha caminda.
- Mester investiga y controla e calidad di e asphalt mas cu ta wordo poni.
- Mester investiga otro posibilidad concerni cu e producto di *asfalt* .
- Pa proteha medio ambiente mester introduci *norma y ley internacional* .
- Introduci un *campana* continuo y structural di conscientisacion pa haci *Aruba limpi* y pa ten'e limpi. Mester duna multa den cierto casonan.
- Introduci ley stipulando cu *daño na medio ambiente* ta castigabel. Duna multa a base di e principio cu ta e sushado ta paga.
- *Actua contra destruccion di naturalesa* , medio ambiente y sushamento di lugarnan publico segun ley.
- Mester bin cu medidanan cu ta condiciona kapmento di mata.
- Impone *medida* riba industria *cu ta susha* e medio ambiente. Duna tempo pa deshaci di e sushedad pa propio cuenta. Duna multa of revoca permiso di operacion.
- Revisa *Serlimar* pa su funcionamiento ta profesional y duna un servicio regular, dependiente y di calidad.
- *Revoka e Afl. 10,00* cu particular mester paga na dump di Parkietenbos.
- *Promove reciclahe* : apoya un fabrica di glas of di recohe glas y exporta esaki.
- Introduci *statiegeld* pa asina promove re-uso di boter, pa evita reproduccion di boter innecesario.
- *Promove Energia Alternativa* (solar, biento) pa evita polucion di nos aire y lama.
- *Combati polucion di aire* : condiciona emision segun e normanan internacional, obliga cu autonan no mag di susha aire. Mester cuminsa controla e aire.
- *Destina lugarnan pa parkenan* , specialmente sigui desaroya Parke Nacional Arikok pa proteha flora y fauna y conserva naturalesa.
- Introduci un *maneho* fiho pa *limpiamento di rooi* , labadonan y dam.
- Exigi un *estudio di impacto* riba medio ambiente pa e proyectonan cu tin efecto riba medio ambiente.

[Back to Top](#)

## 11. SECTOR DI HUDICIAL

### A. VISION DI MPA ARIBA TERENO DI HUSTICIA



*Bida na Aruba ta insigur riba tur tereno. Nos no ta biba trankil mas. Criminalidad tin su efecto negativo riba nos vida, pero ta causa daño tambe na nos turismo y economia en general. Pa MPA ta importante cu tur hende wordo trata igual. Pa MPA "Tur hende ta conta". Ley ta conta pa un y Tur.*

Ilegalidad ta inacceptable pa MPA y mester combati esaki. Pero Ley mester wordo enforsa tambe igual pa tur hende sin distincion, legal of ilegal. Abuso no ta aceptabel pa MPA. Tampoco abuso di poder. E departamentonan mester traha eficientemente y segun regla pa e ciudadano tin e confiansa den e departamentonan. Integridad ta esencial pa MPA, pa e pueblo tin confiansa den e departamentonan. P'esey mester bin un sistema pa controla y sigura e integridad di e departamentonan. E delitonan cu tin e pueblo cu mas tension ta: droga, atraco, ladronicia, violencia, maltrato etc. Droga ta un di e causanan grandi pa mayoria criminalidad na Aruba. MPA kier trece trankilidad bek na Aruba.

### **MPA LO PARA PA:**

- "*Ley pa Un, Ley pa Tur.*" Mester trata tur hende igual den casonan igual tambe ora cu ta viola ley. No mag di politisa Cuerpo Policial y Ministerio Publico den nan trabou, nan mester traha solamente a base di Ley, regla y maneho;
- MPA lo ehecuta e proyecto di *ley di iniciativa di MPA contra violencia domestico*. E ley lo obliga cu e abusador tin cu sali for di cas y asina proteha e victima y famia contra mas abuso of maltrato.
- Duna mas yudansa y guia na e *victimanan* di abuso. Tambe pa violencia den famia;
- Duna Cuerpo policial tur e *recursonan* necesario pa realisa su trabou mas miho y efectivo. Mester mas polis, pero *calidad* di polis ta mas importante cu e cantidad.
- Conscientisa pueblo con pa *preveni y proteha* su mes contra *ladronicia*.
- Conscientisa e pueblo pa *preveni incubrimiento*, pasobra esaki tambe ta castigabel (compra di articulo horta).
- *Cooperacion* estrecho entre e diferente *instancianan hudicial /no-hudicial* pa realisa un netwerk di informacion compatibel pa combati criminalidad, droga y ilegalidad.
- Pone e *opvoedingsgesticht funciona*, pa e hobenan por sinta nan castigo y por wordo yuda pa toch nan tin un oportunidad den bida. Pa e capacidad personal por train e ambtenaarnan den *overtolligheidspoel* cu ta riba pay roll caba.
- Bin cu e posibilidad cu e detenido mester sigui un curso di *rehabilitacion* pa e por sali prematuro.
- Percura pa *trafico ta sigur*. Ta resulta cu tin mucho hopi accidente fatal of accidente na Aruba.
- *Combati droga* fuertemente. Droga ta e catalisado di criminalidad.
- Bin cu un plan structural pa *preveni criminalidad*.
- *Hisa e strafnan* cu ta concerni delito di *abuso di mucha y hende*.

**\*Droga** ta causa pa hopi problema y mester combatie riba diferente tereno pareu. Pa logra esey mester bin coordinacion di *diferente ministerio* pa preveni, contene y rehabilita. *Combatimento di droga lo tin prioridad*. Mester combati importacion di droga. Alabes MPA ta di opinion cu mester ataca e problema di benta di droga for di un *cas den bario*. Esaki ta un molester grandi pa e bario.

- Mester tin *cooperacion* estrecho entre e tres entidadnan, Duana, Warda Costa y Cuerpo Policial, pa forma e barera total pa proteha e comunidad contra droga y su consecucionan;
- Sigui cu e *cooperacion internacional* sin descuida e atencion y esfuerso local;
- Sigui y *intensiva control* na e puntonan vulnerabel: aeropuerto, waf, rif, lagoen y e sitionan aleha, pa evita droga drenta Aruba;
- Trata pa yega na un acuerdo/tratado specialmente pa e "mulanan"/prisionero stranhero por *sinta nan castigo na nan pais*;
- Duana ta e prome barera contra importacion di e.o. droga. Mester percura pa *Duana* tin tur e *recursonan y training* necesario pa por haci nan trabou optimal. E personal mester tin e actitud corecto y integro. Mester bay *scan e containernan*;
- Polis y specialmente esnan encarga cu e operacionnan contra droga, mester haya e *ekipo/material*, personal y training necesario pa por ehecuta nan tarea na un manera profesional y integro;
- Sostene diferente instancia/fundacion cu ta trahando sea riba tereno di *Prevencion* (specialmente bou di hubentud) of *Rehabilitacion* di uzo di droga;

- Mester bin un instituto special/apart pa *rehabilitacion di hoben cu ya a bira adicto*, pa evita di haya mas problema si trata nan hunto cu adulto. Esaki por ta un seccion apart den un Centro Hubenil cu Aruba mester como pais;
- Pa frena e problema di adicto mester *informa pueblo* (famia) con y ki ora por pidi ayudo pa aplica Ley di Curatela;
- Ora cu famia no opta pa uza *Ley di Curatela, Ministerio Publico* mester cuminsa haci uzo di e posibilidad aki pa e *adictonan ambulante (choller)* por wordo trata hasta contra nan boluntad.

E problema di choller mester wordo soluciona cuminsando cu un lugar na unda nan por keda, pa soluciona e molester cu nan ta trece. Pa MPA Tur hende ta Conta y p'esey MPA ta di opinion cu mester duna ayudo na e choller. E bario tambe tin un parti den esaki. Si e famia no ta tuma e responsabilidad, e ora gobierno mester tuma e pasonan pa duna ayudo obligatoriamente. MPA ta desea un cooperacion riba e tereno aki cu Reino. MPA lo sostene e instancianan cu ta traha cu e adictonan di droga, pero esaki mester bay coordina.

- Pa frena e problema di adicto mester *informa pueblo* (famia) con y ki ora por pidi ayudo pa aplica Ley di Curatela;
- Ora cu famia no ta opta pa uza *Ley di Curatela, Ministerio Publico* mester cuminsa haci uzo di e posibilidad aki pa e *adictonan ambulante (choller)* por wordo trata hasta contra nan boluntad.

E situacion di cas y di e edificacion bandona tambe mester di atencion, pasobra e ta empeora e problema di choller. Mester di un maneho pa combati esaki: e doño mester bin cu un solucion dentro di un tempo defini, sino autoridad mester actua.

#### \* Cuerpo Policial:

*E seguridad di e ciudadano ta hopi importante pa MPA. Polis ta principalmente responsabel pa mantene e seguridad. Cuerpo Policial mester fungi como e defensor di pueblo. Polis mester aplica ley segun ley y un ley pa tur.*

E *posicion legal* di polis tin cu wordo regla bon. Promesanan haci mester wordo cumpli, tanten cu esaki no ta un favor politico. Esun encarga cu e responsabilidad (e mando) mester carga su responsabilidad. *No* mester *interveni* politicamente den e trabou di Cuerpo Policial.

Polis mester funciona optimalmente, p'esey mester tin *ekipo* adecuado pero *tambe training* continuamente.

Polis lo keda eherce su tareanan den e 4 districtonan. Banda di esey mester sigui introduci y activa e concepto *di polis di bario* pa hisa seguridad den bario. Cada distrito lo sigui nan tarea riba tereno di surveillance, recherche, trafico y leynan specifico. E trahadornan di e districtonan y e polis di bario tin cu ricibi educacion adecua. Ta *un Cuerpo Policial tin*, pero e plan pa cada bario lo por ta diferente mirando e circunstancianan di cada bario.

Cierto tarea tin cu keda *centralisa* manera Criminele Inlichtingendienst, departamento concerni crimen organisa, recherche tecnico y Jeugd en Zedenpolitie. Nan mester haya curso pa nan eleva e nivel pa uno nivel internacional.

Polis mester traha hunto cu *Recherche Samenwerkingsteam* den Reino. MPA ta kere pa tin un Kustwacht adecua. MPA lo no accepta patronahe den Cuerpo Policial. Pa segura integridad di e departamento mester *controla* esaki sistematicamente.

Pa Cuerpo Policial por funciona optimalmente mester percura pa tin e.o. e materialnan en general y esencial.

Mester logra:

- Subi e *porcentahe di solucion* pa e casonan cometi y raporta;
- Duna contenido na e *ayudo na e victimanan* di crimen, dunando informacion na e victima of na su famia, pa nan sa na cua instancia nan por acudi pa yudansa;
- Forma un *ekipo special* pa atende e delitonan cu ta ocuri mas frecuente, manera joyriding y atraco. MPA ta na favor pa companianan di seguro introduci un sistema di GPS den auto.
- *Trafico* tambe mester bira mas sigur. Polis mester ta mas proactivo ora ta patruya riba caya y enfoca y actua riba infraccion di ley di trafico y eherce mas accion specifico di control. Mester duna mas informacion di prevencion, manera faha

di seguridad y asiento di mucha etc. Mester controla manehamento bou influencia di alcohol.

- Polis mester tin *personal specialisa* pa atende e problema grandi di *violencia domestico* . En especial ora ta concerni mucha. Mester stimula y expande e ayudo pa e victima. MPA lo introduci mas pronto posibel e ley di proteccion di victima di violencia domestico y curso pa polis con pa atende e situacionnan asina.
- Combati vandalismo y conducta asocial y di intimidacion.
- Evalua e posibilidad pa introduci un *seguro adicional* di riesgo pa cuerpo policial.

#### Arma

Preocupacion pa MPA ta e cantidad di arma cu tin den nos comunidad. Combati esaki mester ta un prioridad. MPA ta di opinion cu no mester promove pa un particular tin un arma. Mester *controla* tur facilidad di arma. Nos no kier bira un pais di arma, ni un pais cu bo por bin siña uza arma.

Mester haci bendemento ilegal di arma castigabel; revisa ley di arma, controla y bin cu maneho di "pakkans".

Pa MPA seguridad ta algo hopi serio. Mester reglamenta cu e helicopter ta wordo uza efectivamente y solamente pa e metanan cu tin pa e helicopter, esta motibo di seguridad y pa combati crimen y casonan di emergencia. Otro uzo por pone nos sinti mas insegur.

#### Trafico

E crecemento di trafico a pone cu esaki no ta sigur mas. Cantidad di accidente pa aña ta mas cu 5.800. P'esey control mester ta mas estricto.

- Mester revisa y ahusta e Politieverordering y Wegen en verkeersverordering.
- Mester instala e waarborgfonds manera prescribi den ley
- Mester bin cu mas control riba trafico, specialmente loke ta concerni manehamento bou influencia di alcohol of droga, velocidad, bistimento di helm, maneha sin rijbewijs.
- Mester pone camara na crusada, pa preveni coremento door di luz cora.
- Mester cambia e ley cu ta concerni quadracer, pa stipula cu helm ta rekeri y cu e empresanan cu ta verhuur un quadracer tin un seguro pa e gastonan di accidente, specialmente e gastonan di hospital.

#### Control di permiso di Horeca

MPA ta di opinion cu mester tin un *maneho* pa e permisonan pa bendemento y consumo di bebida den Horeca. Mester controla e maneho. MPA ta di opinion cu den *bario di famia* no por tin lugar cu ta keda habri despues di 24:00 (12'or di mey anochi). E bario mester haya sosiego. Mester tin diferencia den bario di famia y lugar unda bo kier sali. No por combina esaki hunto. Cu dunamento di permiso mester tene cuenta cu esaki y mester controla bon.

P'esey mester revisa, ahusta e Ordenanza de permiso (vergunningenverordering) y determina e maneho y e criterianan, cu nan ta transparente y cu nan lo conta pa tur establecimiento.

E base pa esaki ta angra den e Ley di Zonificacion pa area residencial y area pa actividad commercial y industrial.

Tambe MPA lo ehecuta e *Ley di iniciativa di MPA* mesora, pa cambia e edad pa cumpra/bende alcohol di *16 aña pa 18 aña* . Tambe lo prohibi pa hoben menos cu 18 aña drenta establecimiento cu ta bende alcohol.

**\*Ministerio Publico**

Ministerio Publico tin cu eherce su tarea *independentemente*. E Minister of gobernantenan no mag di interveni den e tarea aki pa pueblo ta segura di un husticia igual pa un y tur. Pa garantiza esaki mester reglamenta y determina e maneho pa despues duna Ministerio Publico e libertad pa ehecuta e maneho independiente di politica. MPA su maneho lo ta pa pone prioridad riba e delitonan di droga, ladronia y problema di adictonan ambulante (choller).

#### **\*Nos sistema Hudicial**

MPA ta sinti su mes confortabel cu e actual sistema hudicial democratico di e estado di derecho y trias politica manera tin den henter reino. MPA ta boga pa bou tur circunstancia e organisacion y autoridad di e sistema hudicial ta den man di e instancianan y hendenan cu ta garantiza obhetividad y imparcialidad trahando independiente. E posicion di nos sistema hudicial den nos Reino ta necesario pa nos por funciona independiente. Discusionnan door di politica cu ta concerni e decisionnan di nos corte ta atacha e confiansa cu nos mester tin den nos sistema judicial. MPA ta di opinion cu mester bin cu un departamento pa Corte den Prome instancia na unda lo por warda tur articulo cu a wordo tuma den beslag. MPA ta boga pa tin parketpolis pa alivia Polis pa nan por tin mas tempo pa eherce nan tarea principal.

#### **\*KIA**

Mester bin cu un maneho pa *resocialisa* e presonan. E detenido lo tin cu traha y siña un ofishi pa despues cu el a cumpli cu su castigo e por logra haya un oportunidad den e sociedad atrobe. Detenidonan stranhero mester sinta nan castigo en principio den nan mesun pais si esey ta posibel. Si esey no ta posibel nan tin cu wordo deporta despues cu nan a sinta nan castigo. Pa e detenidonan cu ta traficante di droga, asesino, y personan cu e ricibi un castigo di mas cu 4 aña y tin dos nacionalidad, lo conta e nacionalidad di e otro pais y nan lo wordo deporta. Si acaso mester tuma accion pa bin cu regla, MPA lo tuma e pasonan concerni.

- E personal tin cu ricibi curso pa nan por garantiza un bon funcionamiento. Nan mester ta cualifica.
- E "mulanan" stranhero cu bay cera na Aruba, mester por por wordo entrega na autoridad di nan pais di origen. Esaki lo baha e presion riba e cantidad di cel na KIA.
- Percura pa tin personal specialisa pa atende cu preso hoben, adicto of preso cu problema mental.
- Mester percura pa tin e materialnan basico pa e cuidadornan di preso por traha na un manera sin pone nan mes den peligro, specialmente medio pa comunica cu otro.

#### **\* Reclassering:**

Cooperacion entre e departamento cu Ministerio Publico y KIA ta esencial. Detenidonan cu nacionalidad Hulandes mester participa den un programa pa nan por resocialisa den nos comunidad y pa por ta eligibel pa e detenido haya reduccion di castigo. Si ta necesario pa bin cu cambionan di ley MPA lo tuma e iniciativanan.

#### **\* BRANDWEER**

- Prevencion di candela lo haya hopi atencion, specialmente pa lugarnan caminda tin aglomeracion di hende (nightclub, restaurant, hotel, sporthall, hospital etc.). Mester bin mas control na e lugarnan publico. Pero tambe control riba cilindernan di gas no-aproba pa uzo den cas.
- E coordinacion entre Brandweer y D.O.W. ora di duna permiso pa construccion mester ta optimal y "Fire Safety" mester ta un parti di e totalidad. E.o. brandweer mester por yega sin mucho problema den centro di Oranjestad y cerca p.e. e partinan (towers) di camber di un hotel; DTI mester haci control periodicamente si ta cumpli cu e exigencianan di "fire-safety".
- Mester percura cu brandweer tin suficiente ekipo pa combati candela. Alabes mester percura cu tin suficiente empleado.

#### **\* DIRECTIE WETGEVING EN JURIDISCHE ZAKEN**

Dir. Wetgeving mester haya e personal specialisa (wetgevingsjuristen) y material necesario pa por haci nan trabou importante di e proceso di legislacion. E departamento aki ta e *consehero huridico principal* pa tur departamento y gobernante. Sin personal cualifica, permanente y medianan necesario, ta tarda cu e trabounan di ley. Aruba ta cana hopi atras riba e modernisacion di nos leyman. Mester di ley pa por trece cambio.

MPA lo sigui traha pa introduci un *fractiemedewerker* pa cada fraccion den parlamento.

#### \* DUANA

Tarea di Duana ta crucial pa nos pais. Un di e tareanan importante ta, combati droga door di evita cu droga ta drenta nos pais door di crusa cualkier punto di nos frontera. P'esey ta di importancia cu Duana tin tur loke ta necesario pa combati importacion di droga.

- Mester structura e departamento pa e traha eficientemente y optimalmente. E control di importacion di tur articulo mester ta rapido, locual porcierto ta trece un entrada considerabel pa gobierno.
- Mester organisa curso constantemente y cumpli cu e trahador cu a bay studia afo y yega bek su isla. Mester bin un maneho fiho pa futuro, pa anticipa e situacion di *vergrijzing* den duana.
- Mester tin e hermentnan pa ehecuta e trabou mas lihe, manera *meetlint* electronico, *vernieuwing* di Asecuda, scan pa container etc., na un manera profesional y integro.
- Mester percura pa e seguridad di e trahadornan. Mester tin un sistema di back up pa e emergencianan cu por tuma lugar den e trabou aki.

#### B. ADMISION DI STRANHERONAN

*Aruba a progresa economicamente y esey a trece cu ne cu nos a haya un avalancha di stranhero. E cantidad di persona di nos poblacion cu ta naci afo di Aruba ta 40%. Aruba mester proteha su mesun herencia. P'esey ta bon pa stabilisa e economia en bes di sigui promove imigracion. Imigracion tin cu bay conhunto cu integracion den nos comunidad. Mirando e cantidad di stranhero na Aruba, ta primordial pa regula admision di stranhero efectivamente. Mester preveni ilegalidad innecesario cu ta resulta door di ineficiencia di nos sistema di otorgamento di permiso. MPA ta di opinion cu si bo kier biba na Aruba mester haci esaki segun nos ley, y aceptando nos cultura y nos custumbenan. Esun cu drenta nos pais ilegal tin cu bandona nos isla.*

- Mester bin cu un *planificacion* y maneho pa determina e desaroyo di e stranheronan. Esaki mester wordo determina den cooperacion cu Departamento Laboral y comercio. Ta primordial pa determina e rekesitonan cu e trahador tin mester, manera cierto capacidad y capacidad di idioma.
- Tambe mester determina te cua edad lo kier stranhero. Den e caso si ta pa e cuponan cu ta keda habri indefini, MPA ta boga cu mester enfoca riba trahador stranhero hoben cu por bin cu nan casa y establece nan mes na Aruba. Ya a wordo determina cu e muchanan cu ta naciendo actualmente na Aruba no ta suficiente pa tur e cuponan di trabou na Aruba.
- Otorgamento di permiso lo keda den man di *DIMAS*.
- Mester bin cu un sistema cu lo *controla e integridad* di e departamento aki. Permiso lo wordo duna solamente a base di ley y maneho fiho. Comercio tambe mester cumpli cu ley y carga e responsabilidad completo pa e trahadornan. "Tur hende ta conta" ta conta pa tur ciudadano inscribi na Aruba cu tin e documentonan legal.
- Pa *trahadornan di reino* lo tin un maneho mas suave, aunke e Arubianonan semper lo mester tin preferencia tanten cu ta cumpli cu e condicionnan di e funcion.
- Mester *evalua funcionamiento di LTU*. MPA lo haci cambio den e ley unda e situacion economico y social ta exige esaki. Pa continuidad mester wak si ta *prolonga permiso en bes di regreso obligatorio despues di 3 año*.

- Mester determina un maneho y e rekesitonan pa e permisonan cu lo ta mas tempo cu 3 aña.
- Na e permiso di traha y estadia na Aruba mester condiciona cu e dunado di trabou ta obliga di manda e trahador un *curso di Papiamento* y tambe cu ta instrui e trahador riba *nos cultura* y custumbernan. Despues di un aña mester entrega e certificado original.
- *Control y vigilancia* di e *ilegalidad* di e personanan na Aruba ta cay bou di Cuerpo Policial y IASA, esaki pa mantene e integridad di DIMAS. Tambe na aeropuerto y na waf e tarea aki tin cu cay bou di Polis.
- Mayoria di ilegal ta drenta Aruba via lama. Mester bin cu un sistema di *control computarisa* (Radex). Mester regula cu e ta bon cla: unda e stranhero lo bay keda, y cu e persona na unda e stranhero ta keda ta completamente responsabel pa e stranhero. Mester trece facilidad cu lo entrega e stranhero directo na esun cu ta bay carga e responsabilidad directo.
- Controla fisicamente 2x pa aña, bou responsabilidad di e dunado di trabou. E detencion di *ilegalnan* tin cu ta mas corto cu ta posibel.
  - Mester percura cu e procedura di admision ta *cortico y eficiente*, specialmente den caso de prolongacion.
  - E maneho di admision mester ta *transparente y conforme Ley* y a base di e maneho fiho y no a base di patronahe.
  - Mester percura pa un *cooperacion* estrecho entre e instancianan concerni, manera DIMAS, Dept. Labor, Inmigracion y Warda nos Costa.
  - Dept. di Labor mester haci un *inventarisacion* continuo di e demanda pa labor.
  - Mester tin *sistema di control* riba esnan cu lo por haci mal uzo di nan posicion riba tereno di admision (*integriteitstoets*).
  - *Control* riba estadia ilegal mester ta constante y estricto. Controla e hende cu a drenta (y no sali) y tuma e pasonan necesario. E persona cu e stranhero ta hospeda cerca dje tin cu ta completamente responsabel pa e stranhero.
  - E personanan lo haya oportunidad pa sali boluntariamente.

[Back to Top](#)

## 12. MANEHO DI MEDIA

*Medionan di comunicacion a pasa door di un desaroyo grandi door di tecnologia nobo, specialmente cu introduccion di internet, telefon celular y cable tv. E avance tecnologico lo sigui cambia mundo y p'esey mester sigui e desaroyo aki bon. E desaroyo a trece tambe cierto desaroyo negativo cu ne, specialmente pa nos hobennan.*

*Na otro pais e proteccion di specialmente e hobennan ta hayando hopi atencion. Den esaki mester observa naturalmente e derecho fundamental di expresion.*

- Mester introduci, unda cu mester, *proteccion* pa esunnan mas vulnerabel den comunidad specialmente nos hobenan asina leu cu e derecho di hoben su seguridad ta prevalece riba e derecho fundamental di expresion liber. Mester minimalisa e peligernan cu e medianan nobo a introduci.
- Mester pone atencion con e otro paisnan ta reacciona riba e *desaroyo tecnologico* .

- Mester renoba nos *leynan di telecomunicacion* pa cubri e desaroyonan di tecnologia nobo.
- Mester introduci un *Ley di Media* pa regula y minimalisa e peligernan, specialmente pa hubentud.
- Lo *reglamenta transmisionnan en bibo* na e radionan, pa evita cu hende ta insulta y uza palabra insolente, door di uza tecnologia moderno cu ya otro pais ta uza.
- Lo promove uzo corecto di *Papiamento* door di media.
- Medianan mester ta consciente di nan responsabilidad civico pa *informa e pueblo corectamente* y na un manera obhetivo. E maneho di media mester ta dirigi pa crea un ciudadano bon informa. Un ciudadano bon informa ta forma su propio opinion miho y asina ta yuda democracia funciona miho cu un participacion activo den destino di su pais.
- Lo aplica e ley existente y introduci regla nobo pa media transmiti *programanan informativo, educativo y cultural di gobierno* y instancianan social-cultural no-gubernamental, sin gasto.

[Back to Top](#)

## IV PUNTO DI BISTA RIBA GOBIERNO

### 1. PRINCIPIONAN DI GOBERNACION

***Aruba ta un pais cu un democracia parlamento cu un consitucion basa riba e trias politica: e poder legislativo (parlamento), e poder ehecutivo (gobierno) y e poder hudicial. Gobernacion ta e poder ehecutivo cu ta administra e pais y ta wordo controla door di Parlamento. MPA ta para pa un gobernacion realmente democratico, integro, transparente y confiabel.***

- Gobernacion mester ta segun e principionan di *bon gobernacion* (behoorlijk bestuur) y asina garantiza cu e aparato gubernamental ta duna un servicio di calidad optimal y un *trato igual* na tur ciudadano.
- Mester institui pa ley un Defensor di Pueblo/ *Ombudsman* independiente di Gobierno, pa asina e ciudadano tin un aliado pa busca su derechonan ora e ta di opinion cu esakinan no ta wordo sirbi door di Gobierno. Por haci keho si e no a wordo trata igual.
- Gobierno mester goberna pa futuro, na unda ta acepta locual ya a wordo haci en bes di kibra e proyectonan di e gobierno anterior sin mira si e tabata bon. Gobierno mester *garantisa continuidad* di gobernación
- Gobierno mester tuma su decisionnan teniendo cuenta cu futuro. Kiermen, *no adhoc* manera ta pasa actualmente.
- Mester consulta cu e partnernan social den comunidad y institui un instituto pa por reglamenta esaki.
- Tin tarea cu ta solamente un Gobierno por haci: seguridad nacional, orden publico, husticia, defensa, seguridad social etc. E otro tareanan cu ta nifica servicio na pueblo mester wordo defini si ta Gobierno mester haci nan. Den pasado a independisa cierto departamento: WEB, Elmar, Setar, Postkantoor, Aeropuerto, etc. Gobierno mester *defini e tareanan* di gobierno.
- Den nos estructura socio-economico Gobierno mester sirbi como e catalisador pa crea un *clima di inversion* apto pa actividad comercial, industrial y social cu e meta pa crea y stimula diversificacion di cupo di trabou.
- Pa cumpli cu e tarea di catalisador Gobierno mester hisa su inversionnan te por lo menos *2% di e GDP* manera recomienda pa e raport di e Comision Nacional pa Finansa Publico (NCPF).
- Mester bin cu un departamento di Human Resources cu ta trata posicion di tur empleado publico na un manera transparente.

- Mester bin cu un sistema transparente pa loke ta concerni vacatura na gobierno door di haci esaki publico. Tambe e nombramento mester ta publico.
- Pa mantene "rechtszekerheid" mester bin mas transparencia y mehora e proceso di LAR.
- Mester bin cu un departamento cu ta cumpli cu e obligacion di LOB, pa ta mas transparente na e comunidad.
- *Parlamento* mester ta mas independiente door di independisa e instancia.
- Mester *consulta e stakeholders* den e trayecto legislativo prome cu trata un concepto di ley na Parlamento.
- Controlaria General mester tin un funcion mas independiente, cu propio presupuesto, pa asisti Parlamento den su tarea di controla Gobierno.
- Mester introduce un Ley pa financiamiento di partido politico, pa yega na un gobernacion cu no ta atacha pa e interesnan di e sponsornan y debe politico.

## **2. ARUBA SU POSICION ESTATAL: REINO Y UNION EUROPEO**

Na 1954 a introduci e Statuut di Reino Hulandes. Aruba tabata forma parti di Antias Hulandes. Na 1956 a funda e Mercado Comun Europeo. Pa Antias Hulandes a pone un excepcion, Holanda so a bira miembro di e Tratado di Roma y Antias Hulandes a bira un miembro asocia di e Tratado di Mercado Comun Europeo, cu despues a bira e LGO.

Na 1986 Aruba a haya Status Aparte y a bira un pais autonomo den reino Hulandes.

Actualmente Antias Hulandes ta wordo reforma unda diferente laso nobo lo bin entre Hulanda y e diferente islanan di Antias Hulandes. Pues e estructura estatal di reino Hulandes ta cambiando: lo disolve Antias Hulandes y remplas'e door di entidadnan nobo.

Aruba a dicidi di keda den Reino. Mester fortalece e lasonan cu nos tin den reino cu actualmente a deteriora. Mester traha riba "Kingdom building" pa asina uni tur partner den Reino. Mester enfoca mas riba local ta uni nos en bes di local ta dividi nos. MPA ta boga pa tin un Comision di Reino na unda ta centralisa tur local ta encera e pueblonan di Reino. Cada partner mester tin un puesto den esaki.

Mas ainda, mester soluciona e problema di deficit democratico cu ta reina den e Rijksministerraad. Ta resulta cu den e asuntonan di reino, Hulanda ta dicidi. Esaki mester wordo cambia, ya cu tur partner den reino ta igual. Mas ainda ora ta toca e asuntonan cu ta regarda Aruba.

Na 2009 e cooperacion financiero entre Aruba y Hulanda ta termina, a base di un acuerdo cu gobierno di Aruba (AVP) a firma. Mester investiga si por anula e acuerdo firma y yega na acuerdo nobo cu Hulanda.

Concerni e laso cu Union Europeo, Aruba tin cu studia cada posibilidad y su consecuencianan. Aruba tin e status LGO actualmente. Tin hopi discusion si mester cambia LGO pa UPG. MPA no ta sostene e sistema di UPG, ya cu esaki no ta beneficia Aruba. Esaki a wordo determina door di e expertonan tambe.

E actual LGO ta un acuerdo entre Aruba y Union Europeo. Kiermen ta negociabel.

Pa posicion di Aruba cu Union Europeo, MPA ta boga pa un relacion diferente na unda Aruba lo tin representacion berdadero y lo tin beneficio di berdad. Actualmente ta desaroyando un sistema nobo segun e "groen boek" cu lo beneficia Aruba. E intencion ta pa asina duna e LGO un posicion cu mas balor na unda e paisnan LGO y UE bira partner strategico pa integra den e regio. MPA lo sigui e desaroyo pa determina si ta momento pa cambia. Ora ta cambia, semper e mester ta pa algo mas miho.

Prome cu tuma un decision pa haci un cambio di un impacto di e grandura aki, MPA ta boga cu mester envolve pueblo den un decision asina. Lo mester inicia un campaña pa informa e pueblo debidamente di e diferente opcionnan a base di e estudionan haci, pa asina yega na un dialogo nacional cu por resulta den un referendum pa e pueblo determina e posicion di Aruba. E resultado di e referendum ta mara gobierno.



[Back to Top](#)

[<<Back>>](#)